

吐逆第一

《巢氏病源》小兒嘔吐逆候：兒啼未定，氣息未調，乳母遽以乳飲之，其氣尚逆，乳不得下，停滯胸膈則胸滿氣急，令兒嘔逆變吐。又乳母將息取冷，冷氣入乳，乳變壞，不捏除之，仍以飲兒，冷入兒腹，與胃氣相逆，則腹脹痛，氣息喘急，亦令嘔吐。又解脫換易衣裳及洗浴露兒身體，不避風冷，風冷因客膚腠，搏血氣則熱，入於胃則腹脹痛而嘔逆吐也。凡如此風冷變壞之乳，非直令嘔吐，胃虛入於大腸則為利也。

漢東王先生《家寶》小兒吐奶說：小兒吐奶有數般，或是風疾所致，則其吐不可安也。吐奶更夾痰，才吐卻即風生。若止吐後，其風無止處，更入外風則潮，熱閉胃管，後變驚風。胃主四肢，被痰涎閉卻即搐；心主神，被外邪所乾即驚；神不定，故變驚風也。故止住吐即驚風發，手足搐搦，口眼翻張，頭項強舉。雖多服名藥，亦不能救療耳。

小兒吐奶，鼻青，客風傷肺。客風者，則是外風也。鼻青是肺之外應也。夜間煩躁者，是肺氣逆而為之也。

身上發熱者，肺主身之皮毛，外邪所傷，故乃發熱。宜下傷寒藥，後平胃氣耳。

小兒吐奶，唇黑多哭是傷脾，夾痰也。唇是脾之外應，被食所傷故黑。其夾痰者，脾能生涎，故痰沖胃而吐奶食。

小兒吐奶身熱，其奶成片子者，是胃有熱，積久即生風也。其人必四肢生瘡，多渴面黃是也。

小兒吐奶不化，夾清水是胃冷。其人必面青唇白是也，宜暖胃止之。

小兒吐奶，早晚發熱則是驚，吐而不睡是也，宜與調驚。

漢東王先生《家寶》：乳食不化，腹急氣逆病証，須進塌氣丸二、三服下卻胸膈（方見本門），卻進觀音散二、三服（方見胃氣不和門中），但生胃氣藥皆可以意與之。又乳母不忌口，吃生冷物，冷氣入乳則乳變壞。又不捏除之，仍以此乳與兒吃，冷乳入腹與胃相逆，則腹脹、氣急肚痛，或變為瀉，亦依前項藥調理。如不退卻，用羌活膏治之（方見本門。）

錢乙：吐乳瀉黃，傷熱乳也。吐乳瀉青，傷冷乳也。皆當下。

《惠眼觀証》：凡生下無故吐乳，此因乳母冷熱不調，啼中喂乳，致令胸膈氣逆，舊乳不化，所以多吐。吐下奶瓣或帶酸氣，謂之奶積。急以牛黃丸療之，（方見風熱門中）。仍服勻氣平胃湯藥。若脾胃虛滑，吃食多吐，只以平胃丸（方見噦逆門中）夾蘆薈丸服之。（方未見。）若至正、二月間，方以湯丸利之。（方見急慢驚風門中）。

《小方脈》論小兒熱盛，患急熱而吐，更下熱藥，脾胃熱而胃口閉，所以吐傷，水穀不通。凡下湯藥、乳食只伏在管，胃口不開；脾伏，乳食上下不動。若下取藥，胃口不開，只在胸膈不上不下，乃是結腸翻吐候也。

歌曰：得患初因是熱傷，熱極吐逆也尋常。醫人不會看形候，又服熱藥怎生當。至今胃開並腸結，莫服冷藥不須涼。若還更取兒當死，先須閉胃後通腸。

《嬰童寶鑒》小兒嘔逆歌：

風冷吹雙乳，乳壞氣須凝。乳兒成嘔吐，氣喘腹膨。解脫當風下，洗浴向檐楹。喘中還喂奶，氣逆在胸停。皆成嘔逆病，醫者貴調停。

《石壁經》三十六種內吐乳候歌：

吐乳從來胃氣實，奶滿胃中生吐逆。吐多遍身有風生，驚邪本是從斯得。吐定無過腦後溫，吐出奶來無變色。先與定氣後除驚，如此醫流無費力。此候胃氣實，其乳或氣不定，或食交奶，或怒未息，或行房了便乳孩兒，使劃時便吐。其奶吐出若不變色無害。若色青黃，或如水之狀，或其中有蟲者，治須涼膈，以溫物暖其腦後，避惡風吹其風府也。既生其氣，又涼其上焦，即止也。

《鳳髓經》歌括同。有注云：宜與玉露散（方見本門。《吉氏家傳方》同。）

《形証論》四十八候吐乳歌一同。後云：此候青色者是驚，黃色者是風熱，有涎者是驚奶，乳解者是傷奶，成塊者是胃冷，臨時辨別用藥。

《本草》主小兒飲乳後吐逆，入腹亦出方。

上用破蘆節中取蟲二枚，煮汁飲之。蟲如小蠶。

《本草》主小兒吐乳方。

上用仙人杖，水煮服之。

《千金》治小兒吐乳，補虛羸止渴方

上以牛乳入生薑、蔥白煎量服。

《仙人水鑒》小兒吐，累醫不瘥方。

水精（一分）當門子（三枚）胡黃連（三分）乾蠍（一枚，以火燒之，切令黑角）代赭 金箔（各二分）黃鹽（四分。陶隱居云：北海黃鹽草粒粗，以作魚及鹹菹）

上和藥同研令細勻，於中夜取蟾酥為丸，如黍米大，一丸至兩丸，熱水吞下，服之立瘥。

《廣利》治小兒吐乳，暖胃正氣方。

上用杉木皮以水煎服。（生廣西，如桑株。）

《經驗後方》治小兒吐不定。

五倍子(二個, 一生一熟) 甘草(一握, 用濕紙裹, 炮過)

上同搗末, 每服米泔調下半錢, 立瘥。

《圖經》治小兒嘔吐逆方。

上取壁錢蟲上錢幕二、七枚, 煮汁飲之。蟲似蜘蛛, 作白幕如錢在暗壁間, 此土人呼為壁繭。

《聖惠》治小兒嘔吐不止, 心神煩悶, 惡聞食氣。人參散方

人參(去蘆頭) 丁香 菖蒲(各一分)

上件藥搗, 細羅為散。每服一錢, 以水一小盞入生薑少許, 煎至五分去滓, 放溫。量兒大小以意加減, 漸漸與服。

《聖惠》治小兒嘔吐煩渴。葛根散方

葛根(銼) 人參(去蘆頭) 桑根白皮(銼) 白朮 陳橘皮(湯浸、去瓢, 焙。各半兩) 半夏(一分, 湯浸七遍, 去滑)

上件藥搗, 粗羅為散。每服一錢, 以水一小盞入生薑半棗大, 煎至五分去滓, 放溫。量兒大小漸漸與服。

《聖惠》治小兒嘔吐不定。丁香散方

丁香 人參(去蘆頭) 白茯苓 木香 葛根(銼) 甘草(炙微赤, 銼) 枇杷葉(拭去毛、炙微黃。各一分) 麝香(半分, 細研)

上件藥搗, 細羅為散, 入麝香同研令勻。不計時候, 以生薑湯調下半錢。量兒大小以意加減。

《聖惠》又方

藿香 丁香 代赭 甘草(炙微赤, 銼。各半兩)

上件藥搗, 細羅為散。不計時候, 以溫水調下半錢。量兒大小以意加減。

《聖惠》治小兒嘔吐心煩, 不納乳食。丁香散方

丁香 人參(去蘆頭。各一分) 茅根(銼) 麥門冬(去心。各半兩) 甘草(炙微赤, 銼) 陳橘皮(湯浸, 去白瓢, 焙。各一分)

上件藥搗, 粗羅為散。每服一錢, 以水一小盞, 煎至五分去滓, 稍熱頻服。量兒大小以意加減。

《聖惠》治小兒脾胃氣逆, 嘔吐不止。肉豆蔻丸方

肉豆蔻(去殼) 木香 訶梨勒皮 朱砂(細研。各一分) 人參(半兩, 去蘆頭) 麝香(細研, 一分)

上件藥搗, 羅為末, 都研令勻, 用麵糊和丸如麻子大。三、四歲兒不計時候, 以粥飲下三丸。量兒大小以意加減。

《聖惠》治小兒嘔逆。人參散方

人參(去蘆頭) 白朮 乾薑(炮製) 半夏(湯洗七遍, 炒令黃) 桑根白皮 陳橘皮(湯浸去白瓢。各半兩)
上件藥搗, 粗羅為散。每服一錢, 以水一小盞, 入生薑少許, 棗一枚, 煎至五分去滓。量兒大小分減, 溫服。

《聖惠》治小兒飲乳後吐不止。**丁香丸方**

丁香(一分) 藿香(半兩《顛凶經》用一分) 人參(三分, 去蘆頭。《顛凶經》用二分)
上件藥搗, 羅為末, 煉蜜和丸如綠豆大。每服以粥飲研下三丸。《顛凶經》亦治孩子霍亂, 吐瀉、面色青、冷汗, 或四肢冷。

《聖惠》治小兒吐逆不定。**丁香散方**

丁香 花桑葉 人參(去蘆頭) 白茅根(銼) 藿香(各一分)
上件藥搗, 粗羅為散。每服一錢。以水一小盞, 煎至五分去滓。量兒大小分減服之。《九 衛生》五神散, 治吐逆方同, 納花桑葉多一分。《孔氏家傳》又以此方治霍亂。

《聖惠》治小兒吐乳。**麝香丸方**

麝香(一分細研) 杏仁(湯浸, 去皮尖、雙仁, 微炒研入) 丁香(各一分)
上件藥搗, 羅為末, 以粟米飯和丸如麻子大。每服以人參湯研下三丸。量兒大小加減服之。

《聖惠》治小兒吐乳。**菖蒲丸方**

菖蒲 人參(去蘆頭) 赤茯苓(各半兩)
上件藥搗, 羅為末, 煉蜜和丸如麻子大。每服以生薑湯化破三丸服之。量兒大小以意加減。

《聖惠》治小兒吐乳不定。**枇杷葉散方**

枇杷葉(拭去毛, 微炙黃) 母丁香(各一分)
上件藥搗, 細羅為散。如吐者, 乳頭上塗一字, 令兒啞便止。

《聖惠》又方

生地黃汁 人乳(各一合)
上件藥相和, 煎三、五沸, 徐徐與兒服之。

《聖惠》治小兒吐乳, 令乳母服此方。

人參(一兩, 去蘆頭) 生薑(切, 焙乾) 陳橘皮(湯浸去白瓢, 焙。各半兩)
上件藥搗, 篩為散。每服三錢, 以水一中盞, 煎至六分去滓, 分溫二服。服了良久, 令兒飲乳, 大效。

《聖惠》治小兒吐奶方。

雄黃 馬牙硝(各一分) 壁魚兒(五枚)
上件藥入瓷碗子內, 研如泥, 以乳汁半合調之, 使藥注子內。灌少許, 把孩兒抬項, 吐出黑血即定。

《聖惠》治孩子吐奶方。

上取田中地龍糞一兩研末，空心以粥飲調下半錢，不過三、二服。

《聖惠》治小兒吐乳黃色方。

上多與驢乳吃，令大腸稍利，得利即毒瓦斯便散。

《聖惠》又方

上搗韭根汁，滴豇豆大入口中，瘥。

《聖惠》又方

上取新熱馬屎一塊，絞汁半合，灌之效。

《聖惠》治小兒百日內積痰在胸膈，吐乳方。

上取書中白魚七枚，燒灰細研，以乳汁調一字服之。

《聖惠》又方

上取故壁下鼠負蟲七枚，炙令焦細研，以乳汁調半錢服。

《靈苑》黑丸子 退熱定吐逆，兼治小兒食傷方。

山茵陳 蜀升麻 常山(各半兩) 芒硝(半分) 麻黃(去根節，用一兩) 官桂(一分，去粗皮) 附子(一分，燒黑留心)

上同為末，須重羅令極細，旋炒一大錢，入杏仁二粒，去皮尖，燈上燒黑存性。巴豆一粒，壓去油，寒食麵糊為丸如綠豆大，小兒丸如麻子大。每服五丸，傷寒手腳心冷，冷茶清下，日三服。吐血、眼 血出者，生油、冷酒下。吐不止，茅根竹葉湯下。熱攻瀉血，蜜炒，生薑湯下。失音，竹瀝酒下，不過十服聲出。

太醫局 蘇合香丸 療傳尸，骨蒸，，肺痿，疰忤鬼氣，卒心痛，霍亂吐利，時氣鬼魅，瘡瘡，赤白暴利，瘀血月閉，癰，疔腫，驚癇，鬼忤中人；小兒吐乳，大人狐狸等病方。

蘇合香油(入安息香膏內) 薰陸香(別研) 龍腦(研。各一兩) 朱砂(研，水飛) 白朮 丁香 青木香 白檀香(銼) 沉香 烏犀(鎊屑) 藁拔 安息香(別為末，澄去砂石，用無灰酒一升熬成膏) 香附子(去皮) 訶黎勒(燒，取皮) 麝香(研。以上各二兩)

上為細末，入研藥勻，用安息香膏並煉白蜜和劑。每服旋丸如梧桐子大。早朝取井華水，溫冷任意，化服四丸，老、小兒可服一丸，溫酒化服亦得，並空心服之。用蠟紙裹一丸如彈子大，緋絹袋盛，當心帶之，一切邪神不敢近。

太醫局 小丁香丸 消積滯生冷、留飲宿食，止痰逆惡心、霍亂嘔吐。治心腹脹滿，脅肋刺痛，胸膈痞滿，噎塞不通。常服順脾胃，進飲食。又治小兒吐逆不定方。

丁香(三兩) 肉豆蔻(三十個) 木香(一兩半) 五靈脂(一十二兩) 巴豆(去皮出油，二百一十個) 上為細末，入巴豆令勻，麵糊和令得所，丸如黍米大。每服五丸至七丸，溫生薑湯下，橘皮湯亦得，食

後服。如霍亂吐逆，煎桃葉湯放冷下。小兒吐逆不定，三歲兒服三丸，五歲以下服四丸，用生薑桃葉湯下。

太醫局 **丁香散** 治小兒胃虛氣逆、嘔吐不定，精神羸困，霍亂不安方。

丁香 藿香(去枝梗。各一分) 人參(半兩，去蘆頭)

上件同杵，羅為散。每服一錢，水半盞，煎五、七沸，入乳汁少許去滓，稍熱時服，不計時候。

《譚氏殊聖》治小兒吐逆，下膈和胃。**紫朴散方**

上用濃朴去粗皮，以生薑汁炙令香熟，為細末。每服一字或半錢，米飲調下，溫服。

《譚氏殊聖》治小兒吐逆不定方。

上用乾薑炭火燒及八分，研如粉。每服一字至半錢，以蜜湯放冷，調下立效。

《嬰孺》**王子湯** 治小兒吐下不止方。

赤石脂(九錢) 黃連 甘草(炙) 乾薑(各六銖) 黃芩(二錢) 膠(一挺，如指大) 黃蠟(一彈子大)

上以水三升煮取一升，納蠟並膠令烊盡。為三服或四、五服，以意加減良。

《嬰孺》治小兒吐下後，內虛氣奔上，飲食嘔逆而煩方。

濃朴(六分) 桂心(四分) 枳實(三個、炙) 生薑(二分)

上切，以水二升煎至一升一合，為三服。

漢東王先生《家寶》治嬰孩、小兒乳食不化，腹急氣逆。**塌氣丸方**

巴豆(十片，是五個也) 胡椒(十粒) 丁香(十個) 青橘(十個，湯浸一宿，不去皮瓢，每個入巴豆半個，胡椒一粒，丁香一個，麻線纏結之)

上用醞米醋一碗煮青橘，候醋乾為度，取出，細切青橘，同諸藥焙乾為末，粟米糊為丸如粟米大。每服三歲五丸，五歲七丸，七歲十丸。飯飲下，一日三服。

漢東王先生《家寶》治嬰孩小兒吐逆不止。**羌活膏方**

羌活 獨活(各去蘆頭) 人參 白茯苓 防風(蠶頭者) 肉桂(去粗皮、不見火) 全蠍(炒) 水銀(各一兩) 硫黃(三錢，同上項水銀研令青色，各不見水銀星方可用)

上為末，煉蜜為膏。每服旋與嬰孩如黑豆大，二、三歲如龍眼核大，五、七歲如龍眼大，薄荷湯化下。

錢乙香銀丸 治吐方。

丁香 乾葛(各一兩) 半夏(湯浸十次，切、焙) 水銀(各半兩)

上三味同為細末，將水銀與藥研勻，生薑汁丸麻子大。每服一、二丸至五、七丸，煎金銀湯下，無時。

張渙 **養中湯方** 養脾胃，治嘔吐不止。

大附子(炮裂, 去皮尖臍, 一枚) 沉香 木香(各半兩) 人參(一兩) 官桂 半夏(湯浸七遍, 焙乾。各一兩)

上件搗, 羅為細末。每服一錢, 水一小盞, 入生薑三片, 煎五分去滓, 放溫時時服。

張渙 香參湯方 消寒痰, 治嘔吐。

藿香葉 人參 舶上丁香皮 丁香 白茯苓(各一兩) 青橘皮(去白) 木香 甘草(炙。各半兩)

上件搗, 羅為細末。每服一錢, 水一小盞, 入生薑二片煎至五分去滓, 溫服。

張渙 萬安丹方 治胃虛久吐。

半夏(湯洗七遍, 焙乾為末) 硫黃(末) 白朮(炮為末。各一分) 朱砂(半兩, 細研, 水飛) 附子(一枚, 炮製去皮臍, 別搗為細末)

上件同拌勻, 生薑汁和丸如黍米大。每服十粒, 米飲下。

張渙 菖陽散方 和心胃, 治嘔吐。

菖蒲(一兩, 一寸九節者) 丁香 人參 木香 檀香(各半兩)

上件搗, 羅為末。每服半錢至一錢, 生薑自然汁少許同白湯調, 放溫令下。量兒大小加減。

張渙 勻氣湯方 寬中止嘔吐。

白朮(三分) 人參 丁香 木香 甘草(炙) 青鹽 濃朴(生薑製, 炒香熟。各半兩)

上件慢火炒香熟為度, 碾、羅為細末。每服半錢至一錢, 沸湯點服。

張渙 溫膈湯方 勻氣治嘔逆。

丁香 草豆蔻(去皮用) 人參(去蘆頭。各半兩) 青橘皮 檳榔 甘草(炙。各一分)

上件搗, 羅為末。每服半錢至一錢, 入生薑自然汁少許, 溫湯調下。

張渙 香朴散方 調冷熱, 治嘔吐

丁香 麥門冬(去心。各半兩) 濃朴(去粗皮, 塗生薑汁, 炙令香熟) 人參(去蘆頭。各一兩)

上件為細末。每服一錢, 水一小盞, 入生薑二片, 棗一枚, 同煎至五分去滓, 溫服。

張渙 白朮湯方 治嘔吐, 滋津液。

白朮(一兩) 陳橘皮(湯浸去白, 焙乾) 人參(去蘆頭) 桑根白皮(銼) 半夏(湯浸七遍, 焙乾。以上各半兩)

上件搗, 羅為細末。每服一錢, 水一小盞, 入生薑三片, 煎至五分去滓, 溫服。

張渙 香葛湯方 治嘔吐後渴甚, 津液燥少。

藿香葉 白茯苓 甘草(炙。各半兩) 丁香 乾葛根(銼) 人參(去蘆頭。各一兩)
上件搗，羅為細末，次用麝香一錢細研，同拌勻。每服半錢至一錢，生薑湯調，放溫服。量兒大小加減。

張渙 枇杷葉湯方 治嘔吐煩渴。

枇杷葉(一兩，拭去毛，炙微黃) 丁香 人參(去蘆頭) 白茯苓 甘草(炙。各半兩)
上件搗，羅為細末。每服半錢，煎紫蘇湯調下。量兒大小加減。

張渙 遺方藿香散 治小兒脾胃不和，吐逆。

藿香葉(半兩) 人參 丁香 菖蒲(一寸九節者) 半夏(薑汁製。各等分)
上為細末。每服一錢，水八分盞，生薑二片，煎至四分去滓服。

張渙 遺方銀液乳香丸 治小兒久吐不定。

紅牙大戟 半夏(二銖，用漿水煮軟，切、焙，乾秤) 乳香 貫眾 粉霜(各一分) 朱砂 膩粉(各一錢)
水銀(砂子，一皂皂大)
上為細末研勻，用黃蠟熔丸和如綠豆大。每一歲二丸，二歲三丸。以上量大小加減丸數，研大麻仁水下。

張渙 遺方真朱丸 治小兒久吐，諸藥不效者，此方神驗。

水銀(砂子) 輕粉(各一錢) 丁香(一分) 紅牙大戟(一兩半，漿水煮過) 乳香 五靈脂(末。各半兩)
上為細末，用黃蠟九錢，重熔，入藥末攪勻，和丸如粟米大。每服五丸，煎馬齒莧湯下。

《嬰童寶鑒》治小兒只吐不瀉，腹中疼痛。玉露散方
上以寒水石燒為末。每服半錢，薑水調下。

《嬰童寶鑒》治小兒吐逆。人參散方

人參(末，三分) 丁香(末，一分) 藿香(末) 甘草(炙。各半兩)
上件和勻。每服一字半錢，飯飲下。

《良方》治大人、小兒吐。紫粉丸

針砂(醋浸一夜，辟去醋，便帶醋炒，且候並銚子紅色無煙乃止，候冷細研，更用醋團火燒通赤，取候冷再研極細)
上件藥用麵糊丸如梧桐子大。每服四十丸，粥飲下。服訖，便吃一盞許粥，已不吐。如未定，再服決定。
小兒小丸之，隨兒大小與此藥，極神異。然吐有多端，《良方》中有數法，皆累驗者，可參用之。

《良方》大人、小兒吐逆。軟紅丸

辰砂 信砒(各半兩強) 胭脂(一錢) 巴豆(七個, 取霜)

上熔蠟少許, 油三、兩滴和藥為劑, 以油單裹之, 大小如綠豆大, 小兒如芥子。濃煎槐花甘草湯, 放溫下一丸。忌熱食半時久。此藥療人吐只一服止, 嘗與人一丸。偶兩人病, 分與兩人服, 兩人皆愈。

《九 衛生》藿香散 療小兒嘔不定, 虛風喘急方。

藿香 白附子(等分)

上同為細末, 米飲調下一錢。

《九 衛生》草金散 療小兒吐逆方。

爛大梔子(三個) 草烏頭(一個)

上件同於小藏瓶內, 用泥固濟燒, 煙盡取出, 研細。每服一字, 生薑汁調下。

《聚寶方》香茅散 治小兒吐乳。

藿香 白茅根 丁香花蕊葉 人參(各一分)

上五味為末。每服一錢, 水一小盞煎至五分, 加減服。

《聚寶方》白餅子 治小兒吐逆。

白滑石 黃鷹條(各一錢) 半夏(一枚, 炮) 蛤粉(半錢)

上四味為細末, 薄麵糊為丸如豌豆大, 捏為餅子。每服三餅, 煎丁香湯下。新生兒, 湯內研灌半餅。

《三十六種》治吐乳。人參散方

人參(半兩) 藿香 丁香(各一分)

上為末。每服半錢, 水半盞, 乳香少許, 同煎至二分溫服。

《寶童方》治翻胃吐逆, 腹內虛鳴。

天台烏藥(醋炙或炒) 半夏(各半兩) 白薑(一分) 羊屎(十粒, 羊腹內者)

上件用文武火炒為末, 熔為丸如此○大。每服五丸至七丸, 紅酒下。

《劉氏家傳》醒脾散 治小兒脾胃滯、吐食, 一切慢驚、慢脾風, 大能醒脾。如危困多睡, 飯飲調下一字至半錢, 止吐瀉方。

大天南星(一個, 重三錢以上者)

上件熱湯燙七次, 開臍入朱砂一塊如黃豆大, 薄紙濕裹。開地穴深四寸, 方圓八寸, 藥仰安穴內, 地上以黃泥餅蓋, 用泥固臍, 用炭火二斤地上燒, 候火盡冷後取, 末之, 入腦麝少許, 金銀薄荷湯下一字至半錢。

《劉氏家傳》小兒吐逆方。

薄荷 茴香(炒。各等分)

上用生藕汁二合，麥門冬飲二合，調半錢下。

《劉氏家傳》小兒翻胃吐逆方。

上用硫黃研細，生薑汁入沙糖，調硫黃一大錢，下立止(大人亦治)。

《劉氏家傳》治小兒氣胃不和，臟腑泄瀉，不思乳食，或奶嘔逆。異攻散方

藿香葉 白朮(炒) 人參 白茯苓 陳皮(炒) 木香 肉豆蔻(面裹炮，去面不用。各等分) 甘草(炙)
上為末。每服小半錢，紫蘇飯飲調下。

《劉氏家傳》平胃丸 治小兒一切吐不住，兼常服大壯胃氣方

馬芹子 白僵蠶(去絲) 丁香(各半兩)

上件為細末，煉蜜為丸如此○大。煎陳橘皮湯化下。

《莊氏家傳》蠍梢丸 鎮驚、化痰、祛風，兼止嗽、定吐逆，除一切驚積方。

蠍梢(炒) 半夏(湯洗七遍) 丁香(揀者炒) 朱砂 白附子(炮製。各一分)

上件為末，生薑自然汁煮麵糊為丸如綠豆大。每服十丸，加至十五丸，用薑湯下，不拘時候。

《莊氏家傳》治吐奶方。

蓮子心(七個) 丁香(三個) 人參(三寸)

上細為末。以綿裹乳汁浸，令小兒吮吃妙。

《莊氏家傳》又方

藿香(半兩) 何首烏 白扁豆 甘草(炙) 糯米(以上各等分)

上為細末。半錢，用水一小盞，入淡竹茹，煎至七分冷服，臨臥空心。

《孔氏家傳》治小兒吐奶方。

上用生薑、橘皮等分煎湯，與乳母服。

《孔氏家傳》醒脾散 治小兒因吐胃虛生風，胃氣欲脫方。

人參 天南星(等分，各碾)

上為末。旋抄，每服二味各半錢，冬瓜子三、七粒，水一盞半煎兩茶腳許，通口服，不計時候，以胃氣生為度。大人亦可服，須倍煎之，以知為度。

《孔氏家傳》治小兒吐不止方。

上用香白芷為末。每服一字，煎茅根湯調下，淡甘草湯亦得。

《王氏手集》香葛半夏散 治痰逆嘔吐，胸膈痞滯、煩渴胃脅、壯熱頭痛方。

藿香 乾葛 牙硝 滑石(各三分) 半夏(半兩) 甘草(炙, 二分)

上同為細末。每服一錢, 水八分盞, 入生薑二片, 木瓜少許, 同煎四分去滓, 溫服, 不計時候。

《王氏手集》治小兒久吐。**玉壺丸方**

半夏 白面(各一兩) 天南星(大者一個) 天麻(半兩)

上件為末, 薑汁化柳膠為丸黃米大。每服十丸至十五丸, 漿水煮四沸, 服以煮漿水下。如無漿水, 以柳枝三兩莖煮之亦妙, 後服太醫局丁香散(方見本門。)

《王氏手集》**丁香膏** 治大人、小兒吐逆方。

丁香 藿香(各一分) 硫黃(二分) 柿蒂(十個) 水銀 木香(各一錢) 蠟茶 槐花(各半兩)

上先研水銀、硫黃令勻, 入在眾藥末內, 煉蜜和成膏, 以蠟紙裹。大人一杏核大, 煎桑葉湯下, 甚者三服。

小兒量大小加減, 一皂皂大, 薄荷湯化下。

《趙氏家傳》治小兒吐逆不定, 虛困生風。**硫黃半夏丸方**

硫黃(一錢) 半夏(半兩, 湯浸洗七遍) 蠍梢 白附子(炮。各一分)

上為細末, 麵糊丸如綠豆大。生薑米飲下。

《趙氏家傳》**不換金散** 治小兒吐逆方。

片子薑黃 草龍膽(各一兩) 乾葛(一兩半)

上為細末。五歲以下小兒每服半錢, 用重帛子裹藥在內, 以線扎定, 放入甜水半盞中, 用慢火煎存三分以來。溫服。

《吉氏家傳》治吐奶腹脹方。

代赭石 麝香 巴豆(各一分) 赤石脂 杏仁(各半兩)

上件細末, 蜜丸如桐子大, 米飲下。三日兒一丸, 百日、一歲二丸。

《吉氏家傳》治吐奶方。

母丁香(三、七粒) 僵蠶(直者七個, 淨洗去粉, 炒)

上焙乾為末。每服一字, 煎棗湯調下。

《吉氏家傳》治吐奶。**豆蔻散方**

肉豆蔻(面裹炮赤熟, 去面為末) 草果子(炮去皮。各一個) 縮砂(去皮) 甘草(炙) 肉桂(不見火。各一錢) 陳皮(半錢, 去白)

上為末。每服半錢, 陳米飲調下。

《吉氏家傳》**玉露散** 治小兒吐奶, 面赤煩躁方。

不灰木() 滑石

上為細末。每服半錢或一字，生油並水調下。

《吉氏家傳》治翻胃嘔逆方。

朱砂 砂 礬砂(各半錢) 巴豆(七粒，去油) 柏子仁(七十粒)

上末，用酸醋浸，蒸餅糊為膏，油紙裹旋如此○大。米飲下一丸，常服薑湯下。

《朱氏家傳》治小兒交奶吐下方。

豆蔻 母丁香 宣連(各一兩)

上件為散，空心米飲調半錢服之。

長沙醫者李剛中治小兒吐藥方。

川當歸(洗、銼) 甘草(炙。各一分) 桂心(去粗皮，不見火) 枳殼(湯浸去瓢切，麩炒黃色) 北五味子(揀淨。各半兩)

上五味修製了一處，為細末。每服一錢，水七分，煎半盞溫服。大人亦可加藥末三錢，水一盞，煎七分服。

長沙醫者丁時發傳肉豆蔻散 治小兒脾胃不和，憎寒壯熱，腹痛嘔吐，不納乳食方。

白豆蔻 肉豆蔻 甘草(炙) 芎 陳皮(去皮) 枇杷葉(去毛炙。各一分) 黃耆(炙) 乾木瓜 人參(各半兩)

上為末。每服一錢，水五分，薑棗同煎三分，去滓服。

長沙醫者鄭愈傳治小兒吐逆方。

上取舊船上鍛石，不計多少為末。每服小兒一字，先滴油一點在漿水內，調藥灌下。大人半錢。

長沙醫者鄭愈傳治吐逆藿香散方

藿香 赤曲(各二錢) 半夏(一錢，薑汁製)

上件為末。每服半錢，南木香湯下，木瓜湯亦得。三服立止，次用調中散(方在次。)

長沙醫者鄭愈傳調中散方

枳殼(二錢，煮遍) 陳皮 半夏 人參(各一錢)

上為末，每服一錢。水一盞，薑棗煎六分服。

長沙醫者鄭愈傳治吐方。

丁香 胡椒 半夏 乾葛(各一錢)

上為末。每服一錢，生薑一片，水一平盞，煎至六分，去滓溫服。量兒大小加減。

長沙醫者鄭愈傳治吐又方

雞舌香(二個) 母丁香(七個) 附子(炮去皮) 硫黃 水銀 錫砂子(各二錢)

上為末，糯米粥為丸如梧桐子。米飲化下一丸，不計時候。

長沙醫者鄭愈傳治小兒吐逆不定方。

丁香(四十九個) 葛根(末，一錢) 半夏(七粒，湯浸洗七次)

上件四味為細末，用溫湯浸，蒸餅為丸如黃米大。每服十丸，煎葛根湯下，不計時候。

長沙醫者鄭愈傳大戟膏 治小兒、大人吐方。

大戟(水略煮過，焙乾為末) 丁香(各半兩) 膩粉(一錢，研) 水銀砂子 朱砂(各一錢半)

上件五味為末，黃蠟半兩，乳香皂角，用蠟同化為汁，和藥為膏，旋丸如綠豆大三、五丸，小兒如黃米大二、三丸。熱吐，研脂麻冷水下。冷吐，煎丁香湯下。驚吐，煎馬齒湯下。

長沙醫者鄭愈傳油朱散 治小兒吐方。

滑石 丁香(各末) 豬牙皂角(去皮，用蜜炙黃色。各一錢)

上件為末。每服半錢，用漿水半盞，滴好油一點在漿水，下抄藥在油星上，候沉下調灌之，不計時候。

長沙醫者鄭愈傳水銀丸 治小兒啼叫不止，乳母便將奶喂，因被怒氣未定，為涎裹乳，留滯胸膈，面色痿黃，或時發熱、吐逆方。

上用積聚門中三出丸藥末五、七銅錢，入水銀、艾同研令勻，星盡為度。亦用醋麵糊為丸如綠豆大，朱砂為衣。金銀薄荷湯下三、五丸，乳食後。

《聖惠》：小兒嘔吐奶汁，灸中庭一穴一壯。在臍中穴下一寸陷者，炷如小麥大。

《嬰童寶鑒》灸法：吐食灸上管、中管各三壯。

吐第二

《巢氏病源》小兒吐 候：小兒吐 者，由乳哺冷熱不調故也。兒乳哺不調，則停積胸膈，因更飲乳哺，前後相觸，氣不得宣流，故吐 出。診其脈浮者，無苦也。

《本草》小兒嘔逆與 乳不同，宜細詳之。#乳，乳飽後 出者是。

茅先生：小兒生下有中吐 奶形候。奶不穩而從口角頭自流出，身微熱，口鼻微冷，面目青黃，眼慢。此候因乳母房室淫，兒子叫，更將乳與吃，而陰陽不順，兒子胸膈不快，吃乳停滯在於胃，不消化而胃冷致此。奶不穩，遂自然從口角頭流出。所治者，先以睡驚沉香飲子(方見霍亂門中)夾丁香散與服(方見吐利門中)，夾活脾散調理即愈(有二方，一見胃氣不和門中，一方見慢脾風門中)。恐脾虛受熱，狂躁不睡，眼偏微喘，傳歸慢脾風，惡候不治。又小兒吐 奶死候歌：

吐 多時治不痊，脾虛狂躁睡難安。眼偏上視多微喘，傳慢須知命入關。

《嬰童寶鑒》小兒 奶歌：

乳母寒溫不節量，致令壅滯在胸膛。更加新乳相投觸，不得宣通入胃腸。此名 奶須調理，診得輕浮尚不妨。

《石壁經》三十六種內 奶候歌：

凶陷時時動不停，吐中時覺乳生腥。眼渾青碧生白膜，汗出津津腳似冰。氣細元因傷胃冷，氣粗卻是欲生驚。是風從早宜醫療，暖胃和脾氣乃平。此寒熱相勝使然也。氣急則是胃實，當涼則愈。若凶門陷下，氣細，當生胃氣。若渾身熱甚，目中白膜，甚者氣出喘粗，若不急治，必作蝮。

《鳳髓經》歌括同，有注云：氣散，宜與地黃散；氣粗宜與蔥湯丸取。（地黃散見霍亂吐利門。蔥湯丸見驚積門。《吉氏家傳》方同。）

《小兒形証論》四十八候 奶歌一同，後云：此候是驚奶沖胃氣，或交奶沖脾，或是氣奶，或是病奶，致吐出遠聞腥氣，與 丸（方見一切癩門中）。氣細脈沉與調胃散（方見積熱門中）。

《葛氏肘後》小兒 嘔吐下方。

甘草（炙） 人參 當歸 乾薑（各一分）

上為末，水一升煮取五合，分服，日三。湯或內半分麝香益佳。#嘔吐下如霍亂狀。此方出《短劇》。

《嬰孺》治小兒吐，膈上有冷方。

細辛 橘皮（各一分） 大黃 甘草（各三分） 乾薑（二分）

上切，以水二升半煮取八合，溫一合，日三服。

《嬰孺》治小兒吐。當歸湯方

當歸 黃芩 甘草 芎 黃連（各一分） 細辛 乾薑（各二分半）

上切，以水二升煮取八合，服半合，日三，溫服。

張渙：嬰兒飲乳過多，胸膈不快，或多吐，大便奶瓣不消，宜用消乳丹方，兼宜令兒乳後常服。

木香 丁香 青橘皮（炒黃） 肉豆蔻（各半兩） 牽牛子（一錢，炒黃）

上件搗，羅為細末，滴水和丸如針頭大。每服三粒至五粒，粘在奶頭上令兒吮之。

《嬰童寶鑒》治小兒 乳。玉真散方

白朮（半兩） 半夏（七個） 椒（半分，去目、汗）

上件為末，每服半字，水一呷調下。大者一字。

《三十六種》治 奶。青皮散方

青皮 滑石 硫黃（研。各一錢）

上為末。每服半錢，藿香湯調下。

《巢氏病源》小兒噦候：小兒噦，由哺乳冷，冷氣入胃，與胃氣相逆，冷折胃氣不通，則令噦也。

《千金翼》論：胃中虛冷，其人不能食者，飲水即噦。

《千金》治小兒噦方。

生薑汁 牛乳(各五合)

上二味煎取五合，分為二服。《聖惠》同以牛乳二合，薑汁一合，銀器中煎一沸，一歲兒飲半合。

《千金》又方

上取牛乳一升，煎取五合，分五服。《外台》以羊乳煎，無，即以牛乳代。《聖惠》同，只煎三、兩沸。

《古今錄驗》治小兒噦方。

鹿角粉 大豆(末)

上等分相和，乳調塗奶上飲兒。

《聖惠》治小兒噦不止。丁香散方

丁香 藿香 白茅根(銼。各一分) 人參(半兩，去蘆頭) 花桑葉(三兩、炙)

上件搗，羅為散。三、四歲兒每服一錢，以水一小盞入生薑少許，煎至五分去滓，不計時候帶熱服之。更量兒大小以意加減。

《聖惠》治小兒噦逆不止，心神煩亂。人參散方

人參 白朮 白茯苓(各半兩) 甘草(炙、銼) 藿香(各一分)

上件藥搗，粗羅為散。每服一錢，以水一小盞，煎至五分去滓，不計時候，稍熱服之。量兒大小以意減服。

《聖惠》治小兒噦，不納乳食。草豆蔻散方

草豆蔻(三枚，去皮) 甘草(一分，炙，銼) 人參(半兩)

上件藥搗，粗羅為散。每服一錢，以水一小盞，煎至五分去滓，不計時候溫服。量兒大小以意增減。

《聖惠》治小兒多噦，心胸煩悶。麥門冬散方

麥門冬(一兩，去心，焙) 甘草(一分，炙，銼) 人參 陳皮 濃朴(去粗皮，塗生薑汁，炙令香熟。各半兩)

上件藥搗，粗羅為散。三、四歲兒每服一錢。以水一小盞，煎至四分去滓，稍熱頻服。更量兒大小以意加減。

《聖惠》治小兒噦，乳母服人參散方。

人參(三分) 陳皮(一兩, 去白)

上件藥搗, 粗羅為散。每服三錢, 以水一中盞, 入生薑半分, 煎至六分去滓, 熱服, 至夜三、四服。乳母服訖, 即乳兒甚效。

《惠眼觀証》平胃丸 養實胃氣, 大治乾嘔方。

馬芹子(生) 白僵蠶(直者) 丁香

上各等分為末, 煉蜜為丸, 如此○大。每服一丸, 用陳皮一片炙過, 煎湯化下。凡諸疾覺胃氣稍怯, 即服之。

霍亂吐利第四

《巢氏病源》小兒霍亂吐利候：霍亂者，陰陽清濁二氣相乾，謂之氣亂。氣亂於腸胃之間為霍亂也。小兒腸胃嫩弱，因解脫逢風冷，乳哺不消而變吐利也。或乳母觸冒風冷，食飲生冷物，皆冷氣流入乳，令乳變敗，兒若飲之，即成霍亂吐利。皆是觸犯腑臟，使清濁之氣相乾，故霍亂也。挾風而結實者，則身發熱、頭痛、體痛，而腹吐利。凡小兒霍亂皆須暫斷乳，亦以藥與乳母服，令血氣調適，乳汁溫和故也。小兒吐利不止，血氣變亂，即發驚癇也。

《千金翼》問曰：病有霍亂者，何也？答曰：嘔吐而利，此為霍亂。

茅先生：小兒生下有中諸般瀉候，各別各有所見，下藥分次第。下項小兒有中霍亂吐瀉候，上吐下瀉，遍身微熱，不能乳哺。此候因吃食冷熱不調，氣不順，脾家受熱，胃冷不消化致此。所治者，先用沉香睡驚飲(方見霍亂門中)夾丁香散(方見吐利門中)、乳香散(方見一切泄瀉門中)、活脾散與服安樂。(有兩方，一方見胃氣不和門，一方見慢脾風門中)。如傳變，大渴不食，面臉紅，眼微視，氣小不語，汗多，恐化慢脾風，死候不治。

漢東王先生《家寶》：凡嬰孩小兒霍亂而成吐瀉，仍須進大七寶散二、三服(方見本門)，並觀音散二、三服(方見胃氣不和門中)，溫白丸二、三服。如不退，恐脾困不進乳食，須進惺惺散二、三服。如依次用藥不退，往往變作慢脾風，慢驚風。如得此患，宜進竹瀝膏二、三服，間惺惺散(三方並見利久不止門中)調胃氣藥，並沉香散與之(方見本門)。

張渙謹按：小兒霍亂吐利，由陰陽不和，清濁相乾，與大人無異。如救火拯溺，宜速療之。兼宜用聖石丹治之(方見冷吐門中)。又宜順正湯(方見本門)。

翰林待詔楊大鄴問：小兒霍亂吐奶者為何？答曰：凡將息小兒之道，切慎擇奶母：精神爽健，精神詳慢，智惠深遠；身無疾病，脂肉肥潤，溫濃淳善。能調理乳食，何疾更生，眾疾易愈。緣不慎諸味，恣意亂餐孩兒，或變蒸，或乘寒哺乳，或蒸熱飼兒，或醉後嗔怒，或悲啼不常，驚亂神氣，乳食失節，即吐瀉可疑。

《惠眼觀証》霍亂吐瀉形候：忽然吐瀉，謂之霍亂吐瀉。如有渴，即下沉香飲子(方見吐利門中)夾平胃丸服之。

(方見噦逆門中)。苦未有渴，量大小下 湯丸，通一、二遍。白涎(方見急慢驚風門中)，只依前用沉香飲子，平胃丸調理。或尚猖狂躁，夜睡不得，喘息急促，此死候不治。

《玉訣》：小兒霍亂，有此兩証。若胃冷霍亂，身無大熱，但只微溫，面青黃，宜銀白散調氣。若腹痛多喘，口吐清水，面色不定，乾嘔不常，宜蘆薈丸殺蟲（二方並見霍亂門中），後調氣。歌曰：霍亂皆因胃氣傷，冷熱攻脾氣受殃。或積或蟲寒與熱，胃虛乾嘔不尋常。

《石壁經》三十六種霍亂吐瀉歌：

先以青黃面色看，定因風熱在脾間。發如直立人多怕，開眼無休定有涎。胃逆更看風起搖，常疑唇白口多乾。舌上有瘡為熱極，難過二七入黃泉。此候青白滿面者，冷痰在胃間也，亦主吐瀉。若黃赤，胃有熱積所致也，亦主發霍亂。此胃虛實，皆作此証也，治各看其候調治。若失治，則口乾燥煩渴：若搖擗逆候，口中瘡，雞子白滿口者不治，不過二、七日亡也。

《千金》治小兒霍亂吐利方。

人參（一兩） 濃朴（薑製） 甘草（炙。各半兩） 白朮（炮，十八銖）
上四味 咀，以水一升二合煮取半升。六十日兒服一合，百日兒分三服，期歲分二服，中間隔乳服之。乳母忌生冷油膩等。一方加乾薑一分，或加生薑三分。

《外台》劉氏療小兒霍亂吐利不止方。

人乳汁（二合） 生薑汁（粟米許）（一小把） 龍骨（六分） 豆蔻（取仁，碎似蕎麥大，二、七枚）
上以乳煎取一合，著少許牛黃、麝香、兔毛灰等和，分為三服。如渴，以糯米汁著蜜與吃，食即瘥止。

《外台》：《廣濟》療老少冷熱不調，霍亂吐利，宿食不消。理中丸方

人參 白朮 甘草（炙） 高良薑（各八分） 乾薑 桂心（各六分）
上六味搗篩，蜜丸。空腹以飲服如梧子大三十丸，日二服，漸加至四十丸。老小以意減之。忌生冷油膩、生蔥、海藻、菘菜、桃李、雀肉等物。

《外台》：《備急》療小兒霍亂吐利方。

人參（四分） 濃朴 甘草（各二分，炙） 乾薑（一分） 白朮（三分）
上五味切，以水一升煮取四合，分服之。

《外台》：《古今錄驗》療小兒霍亂吐利。人參白朮湯方

人參（六分） 白朮 茯苓（各四分） 濃朴 甘草（各三分，炙）
上五味切，以水一升半煮取六合，分溫服立效。《嬰孺》治期歲兒。

《海藥》主小兒吐利霍亂方。

上用寡婦蓀，取二、七莖煮飲之。

《子母秘錄》主小兒霍亂吐利方。

上用芹葉細切，煮熱汁飲，任性多少得止。

《聖惠》治小兒霍亂後，吐瀉不止，煩悶。半夏散方

半夏(湯洗七遍,去滑)黃連(去鬚)乾薑(炮製,銼)陳橘皮(湯浸,去白瓢,焙)人參(去蘆頭)當歸(銼,微炒。以上各半兩)黃芩 甘草(炙微赤,銼。各一分)

上件藥搗,粗羅為散。每服一錢,以水一小盞煎至五分去滓,不計時候。量兒大小分減,溫服。

《聖惠》治小兒霍亂不止,和胃氣,定吐瀉。**立效方**

胡椒(七枚,拍碎)人參(去蘆頭)生薑(各半兩)陳橘皮(一分,湯浸去白瓢,焙)紅粳米(四十九粒)棗(三枚)

上件藥都細銼和勻,分作七服。每服以水一小盞,煎至五分去滓,不計時候。量兒大小分減,溫服。

《聖惠》治小兒霍亂,吐瀉不定。**丁香散方**

丁香 木香 甘草(炙微赤,銼)葛根(銼)枇杷葉(拭去毛,炙微黃。各半分)藿香 人參(去蘆頭)桑黃(各半兩)

上件藥搗,細羅為散。不計時候,以麝香湯調半錢。量兒大小,以意加減服之。

《聖惠》治小兒霍亂吐瀉,心煩悶。**丁香丸方**

丁香 地黃花 桑葉 朱砂(細研。各一分)甘草(半兩,炙微赤,銼)

上件藥搗,羅為末,研入朱砂令勻,煉蜜和丸如黍米大。每服以生薑溫湯下二丸。三歲以上以意加之。

《聖惠》治小兒霍亂,吐瀉不止,心神煩渴方。

人參(去蘆頭)陳橘皮(湯浸去白瓢,焙。各半兩)麥門冬(去心,焙)訶梨勒皮(微煨)丁香 桂心(各一分)

上件藥搗,粗羅為散。每服一錢,以水一小盞,煎至五分去滓,不計時候溫服。量兒大小以意加減。

《聖惠》治小兒霍亂,吐瀉不止,食飲不下。**肉豆蔻散方**

肉豆蔻(一枚,去殼)丁香 黃(銼)枇杷葉(拭去毛,炙。各半分)桂心 人參 甘草(炙,銼)白茯苓(各半兩)陳皮(一分)

上件藥搗,細羅為散。一歲兒每服以溫水調下半錢。量兒大小以意加減。

《聖惠》又方

乾桑葉 藿香(各半兩)

上件藥搗,細羅為散,不計時候,以粥飲調下半錢。量兒大小以意增減。

《聖惠》又方

肉豆蔻 甘草(炙,銼)藿香(各一分)

上件藥搗,粗羅為散。每服一錢,以水一小盞,煎至五分去滓,不計時候,量兒大小分減,溫服。

《聖惠》治小兒霍亂,吐瀉不止。**龍骨散方**

龍骨(末, 一分) 草豆蔻(末, 半兩) 爛(末, 半分)

上件藥都研令勻, 以奶汁三合, 煎至二合去滓, 別入牛黃、麝香、兔毛灰各一字, 生薑汁少許調令勻, 分為三服。如人行五裡一服。

《聖惠》治小兒霍亂, 吐瀉不止, 心胸煩悶。菖蒲散方

菖蒲 肉豆蔻(去殼) 人參(去蘆頭) 白茯苓(各一分)

上件藥搗, 細羅為散, 不計時候, 以溫生薑湯調下半錢。量兒大小, 以意加減。

《聖惠》治小兒霍亂, 吐瀉不定。人參散方

人參(去蘆頭) 陳橘皮(湯浸, 去白瓢, 焙) 黃連(去鬚) 濃朴(去粗皮, 塗生薑汁, 炙令香熟。各一分)
上件藥搗, 細羅為散。每服以陳粟米粥飲調下半錢。三歲以上, 加藥服之。

《聖惠》又方

甘草(半兩, 炙微赤, 銼) 肉豆蔻(去殼) 乾薑(炮製, 銼。各一分)

上件藥搗, 細羅為散。每服以冷水調下一字。二歲以上加藥服之。

《聖惠》又方

人參(一分, 去蘆頭) 丁香(半兩)

上件藥搗碎, 以奶汁三合, 煎五、七沸去滓放溫。量兒大小分減, 漸漸服之。

《聖惠》又方

丁香(末, 一錢) 消梨(一枚, 絞汁) 奶汁(一合)

上件藥相合令勻, 少少與兒服之。

《聖惠》又方

上用桑椹一枚, 炙焦黃, 細研, 以奶汁灌之。

《聖惠》又方

上用 窠微炙, 搗, 羅為末, 以奶汁調一字服之。

《博濟方》治小兒霍亂, 吐瀉不定。乳香丸

乳香 朱砂(各一錢。研) 半夏(半兩, 湯洗七遍, 薑汁炒黃)

上件三味為末, 麵糊為丸如綠豆大。每服五丸, 米飲下, 日三服。《張氏家傳》方同, 半夏卻用一兩, 又名香砂丸。

《博濟方》治小兒吐奶及霍亂吐瀉不止。真朱散

石亭脂(抄一錢七) 白滑石(末, 炒, 三錢)

上件二味, 同研千餘遍, 看兒大小, 生薑糯米泔調下一字, 立瘥。

漢東王先生《家寶》治嬰孩小兒霍亂吐瀉，不進乳食。**大七寶散方**

木香(炮) 丁香(炒) 官桂(去粗皮，不見火) 茯苓 麻黃(去節) 當歸 甘草(炙) 人參 大腹皮 訶子 川棟子(二味去性) 秦艽(炒。各一錢) 地榆(二錢，炒) 肉豆蔻(一個，炮) 藿香(取葉一錢半，炒) 上為末。每服嬰孩一字，二、三歲半錢，四、五歲一錢。水一藥注或半銀盞，入棗子半片煎十數沸，溫服。

漢東王先生《家寶》：補虛調胃氣，定霍亂，治吐止瀉，進乳食。**沉香散方**

沉香 茯苓(各一分) 甘草(炙) 丁香 藿香(取葉秤。各一錢) 木香(炮) 官桂(去粗皮，令盡，不見火。各半錢) 上為末，每服嬰孩一字，二、三歲半錢，五、七歲一錢，以意加減。紫蘇木瓜湯調下，一日三服。

張渙 **順正湯** 順陰陽，治霍亂吐利方。

白豆蔻 高良薑(微炮) 藿香葉 當歸(洗，焙乾) 草豆蔻(面裹炮) 陳皮(去白，焙乾。各半兩) 丁香(一兩) 上件搗，羅為細末。每服半錢至一錢，溫粥飲調下。

張渙 **二薑湯** 釐清濁，治霍亂吐利方。

高良薑 川面薑(各一兩) 丁香 人參(各半兩) 甘草(一分，炙) 上件搗，羅為細末。每服半錢，米飲湯調下。

張渙 **健脾膏** 治一切霍亂吐利，皆可服之方。

丁香 藿香葉 人參(各一兩) 沉香 木香(各半兩) 上件搗，羅為細末，煉蜜和丸雞頭大。每服一粒，粟米飲化下。

張渙 **香連散** 釐清濁，定霍亂吐利方。

木香 川黃連(去鬚。各一兩) 人參 濃朴(去粗皮，塗生薑汁炙令香熟。各半兩) 上件為細末。每服一錢，粟米飲調下。

張渙 **快膈散** 定霍亂吐利，服藥多吐，即先服此藥。

甘草(半兩，炙) 高良薑(微炮) 肉豆蔻(去殼) 丁香(各一分) 上件搗，羅為細末。每服半錢，新冷水調下。

《嬰童寶鑑》治小兒霍亂吐瀉。**藿香散方**

藿香 香薷(並末。各一分) 白茯苓(末，二錢) 上件研服半錢，薑湯下。如人行三、五裡進一服，連進三服。

《保生信效》治霍亂吐瀉轉筋方。

硫黃 焰硝 晉礬 滑石(並細研) 白面(以上各一兩)

上將面與藥再勻研，滴水丸如梧桐子大。每服三、四十丸，熟水下。小兒量與，仍別作一等小丸。

《三十六種》治霍亂吐瀉。**木香散方**

木香(細銼) 人參 藿香(各等分)

上為末，每服一錢，水五分煎至三分服。

《三十六種》又方**桃仁膏**

桃仁 杏仁 巴豆(各一粒) 朱砂(少許)

上同研飯為丸如米大。每服一丸，以飲吞下。

《劉氏家傳》：小兒霍亂吐瀉方。

草豆蔻 檳榔 甘草(各等分)

上末之，薑煎一錢，空心服。

《王氏手集》**大薑煎丸** 治脾胃伏寒，吐利不止，霍亂煩悶，身體疼痛，發熱嗜臥，手足厥逆方。

乾薑(二兩) 人參 白朮 甘草(各一兩) 黑附子(半兩)

上為細末，煉蜜為丸。一兩作八十丸，每服一丸。白湯六分盞化破，再煎至四分，連滓溫服。

《吉氏家傳》治霍亂吐瀉**丁香散方**

丁香(一錢) 藿香(半兩) 枇杷葉(七片，湯洗泡去毛，炙為末)

上細末，每服一字或半錢，飯飲調下。只兩服住。

《吉氏家傳》治霍亂吐瀉不止方。

乾薑(炮) 人參 白朮(各四錢) 濃朴(二分，薑汁浸，炙)

上細銼，分作四服。每服水二盞，煎至六分，以意加減。

《吉氏家傳》**地黃散** 治小兒脾胃氣衰弱，霍亂吐瀉，嘔逆不食，煩躁迷悶方。

乾地黃 濃朴(薑汁拌炒) 乾葛 人參 茯苓 藿香葉 黃(蜜炙) 白朮(麩炒。各一分) 丁香 訶子(炮，用肉。各一錢)

上為細末。每服半錢或一錢，用蒼朮煮飯飲調下，並進四、五服。

長沙醫者丁時發傳霍亂吐瀉方：孩兒霍亂胃虛鳴，手冷如冰面色青，冷熱未和多吐利，名方順氣便惺惺。

順氣散

人參 藿香 丁香(各一分) 茯苓 乾葛 甘草(炙) 天台烏藥(各半兩) 紅橘皮(一兩)
上件為末。每服半錢，用水六分入棗一個，薑一片、同煎三分溫服。

霍亂第五

(或霍亂吐而不利，或霍亂利而不吐，或止霍亂而不吐利)

《本草》主小兒惡氣霍亂方。

上用梳篦垢水和飲之。

《葛氏肘後》：孩子霍亂，已用立效方，必有神驗。

人參 蘆籜(各二分) 扁豆藤(二兩) 倉米(二撮)

上 咀，以水三升煮，細細溫入口，即當甚效。《千金方》同，倉米只以一撮，又用水二升煮八合。

《葛氏肘後》又方

人參(四分) 濃朴(炙) 白朮 甘草(炙。各一分) 生薑(三分)

上 咀，以水二升煮取五合，去滓，分五服，中間隔乳服之。奶母忌生冷油膩、果面等，大效。《外台》方同，但濃朴、白朮、甘草各二分，余同。

《千金》治孩子霍亂，已用立驗方。

人參(一兩) 木瓜(一枚) 倉米(一撮)

上三味 咀，以水煮分服。以意量之，立效。

《千金》治小兒霍亂方。

上研尿滓，乳上服之。

《千金》又方

上用牛涎灌口中一合。

《外台》：《必效》主小兒霍亂方。

上取廁屋戶帘，燒灰，研。以飲服一錢匕。

《外台》：《必效》又方

上用訶梨勒一枚，先煎沸湯，研一半許與兒服，立止。再服神妙。

《外台》劉氏療百日以來及蓐內兒霍亂方。

上以人乳半合及生薑汁少許，相合煎服，入口定。

《外台》劉氏又療小兒霍亂方。

生薑(四分，研) 香薷 薄荷(各一兩)

上三味以水煎，分溫，兒與奶母俱服之，甚良。

《外台》劉氏療小兒霍亂，空吐不利方。

人參(七分) 生薑(四分) 濃朴(二分，炙) 橘皮(一分) 兔骨(一兩，炙)

上五味切，以水一升二合煎取四合服之，即利下部。又以杏仁、鹽少許，皂角末少許，面和硬搜如棗核大，以綿裹納之，便通。奶母忌熱面。大效。

《外台》劉氏又療小兒霍亂，空利不吐方。

烏牛 草(一團，舒移切) 生薑 人參(各三兩)

上三味切，以甜不酸漿水一升半，煎取五合，分服之。如孩子渴，取蚰 糞，爛龍骨一兩，以漿水煎，澄清，與兒吃即瘥。

《外台》劉氏又療小兒霍亂，不吐不利，肚脹妨滿，上下不通方。

甘草(四分，炙) 當歸(二分) 石鹽(三分)

上三味切，以漿水一升半煎取六合，去滓。牛黃、麝香各半錢七，研，蜜半匙，相合以下灌之，即通。奶母與漿水、粥吃，勿吃面、肉等。

《外台》劉氏又療小兒乾霍，渴熱及壯熱，眼色慢，四大困悶方。

上以烏豆二升，淨乾擇，生薑一兩切，以水三升煎烏豆，皮欲爛即濾取汁二合。和少許蜜吃，即變吐。如人行六、七裡，又與吃，無問大人、小兒，並與服之，效。

《外台》劉氏又療小兒熱霍，諸藥不瘥方。

上用蘆葉二大兩，糯米三大合，水三升，先煮葉，入米煮取一升，入蜜少許和服瘥。不足，即取桑葉二升，生薑半兩，切，以水三升煮，取一升，著一匙白米為飲服。

《聖惠》治小兒霍亂不下乳食麥門冬散方

麥門冬(一兩去心，焙) 白茯苓 人參(去顛頭) 陳橘皮(湯浸，去白瓢，焙) 乾木瓜(各一分) 濃朴(去粗皮，塗生薑汁，炙令香熟) 茅香(各半兩)

上件藥搗，粗羅為散。每服一錢，以水一小盞，入生薑少許，煎至五分，去滓，不計時候。量兒大小分減，溫服。

《聖惠》治小兒霍亂不欲乳食丁香散方

丁香(一分) 人參(半兩，去顛頭)

上件藥搗，粗羅為散。每服一錢，以水一小盞，煎至五分去滓，不計時候。量兒大小分減，溫服。

《聖惠》治小兒霍亂不止肉豆蔻散方

肉豆蔻(一分) 藿香(半兩)

上件藥搗，粗羅為散。每服一錢，以水一小盞，煎至五分去滓，不計時候。量兒大小分減，溫服。

《聖惠》治小兒霍亂但利不吐方。

烏牛糞(半兩，燒灰) 人參(三分) 生薑(半分，切)

上件藥用甜淡漿水一大盞，煎至五分，去滓，不計時候。量兒大小分減溫服。

《聖惠》治小兒霍亂吐逆不止人參散方

人參 藿香 葛根(銼。各半兩) 白朮 濃朴(去粗皮，生薑汁炙令香熟) 甘草(炙，銼。各一分)

上件藥搗，粗羅為散。每服一錢，以水一小盞，煎至五分，去滓，不計時候。量兒大小分減，溫服。

《聖惠》治小兒霍亂不止 散方

故 箴(半兩) 鹽(一字) 牛黃(一黑豆大，細研) 乳汁(一合)

上件藥，將乳汁煎二味三、兩沸，去滓。調入牛黃服之立瘥。

沉香 丁香(各一分) 檳榔 甘草(炙。各半兩) 肉豆蔻(一兩)

上為末，每服半錢。一錢用棗子半個，水五分盞同煎三分，通口服。

《嬰孺》治小兒霍亂，腹脹不得利。牛泄方

上取牛泄絞汁，百日兒服一合，二百日一合半，二歲、一歲二合。

《嬰孺》治小兒霍亂，嘔吐不止。人參飲子方

人參(六分) 濃朴(三分，炙) 粗倉米(二合，淘)

上以水二升，煮取七、八合，絞汁。百日服半合，一歲三服。《外台》方同。

《嬰孺》治小兒霍亂吐乳不止方。

上以人參煎湯服立已。

《嬰孺》又方

上取薄荷葉未乾者，研汁，量多少，捻鼻令口開灌之。

《嬰孺》治小兒霍亂，乳母服之方。

扁豆莖(一升，先炙，令萎，切細) 人參(三兩，切之)

上以水三大升半，取汁煮粟米少許為粥，與乳母服之。衣裹乳，勿令露之，每欲乳兒，先捏去少許，然後乳母乳兒。常服大佳。

《嬰孺》治少小大吐下，心結堅，食飲不下，嘔逆欲死，並霍亂後吐下不止，短氣煩滿。半夏湯方

半夏(四分) 黃芩 甘草(各二分) 乾薑 橘皮 當歸 人參(各三分)

上以水四升，煮一升半，二百日兒服三合。若腹痛加當歸二分，嘔逆甚加橘皮三分。

《玉訣》銀白散 取積，取蟲，後生胃氣，使不霍亂方。

人參 茯苓 甘草(炙) 白朮(麥麩炒) 白豆(去皮)

上各等分，末一錢，紫蘇湯調下。一方有藿香葉等分。

《玉訣》**蘆薈丸** 治霍亂後乾噦不常方。

蘆薈 安息香 胡黃連 枳殼(麩炒。各一錢) 使君子(三、七個, 炒) 蕪荑(一分) 澱粉(一錢半) 麝香(少許)

上末, 豬膽糊丸如此。大、五、七丸, 米飲吞下。

《惠眼觀証》**香參膏** 治霍亂瀉住, 吐不住方。

人參(一指大, 銼之) 丁香(一十四粒) 藿香(一錢) 糯米(七十粒, 同丁香炒合米黃)

上件四味同為末, 用棗肉和為膏。每服一指頭大, 用鹽薑湯下。

《惠眼觀証》**石黃散** 治霍亂吐瀉不住方。

硫黃(半兩) 滑石(一分)

上二味同研令細。每服半錢, 米泔下。

《吉氏家傳》治霍亂吐不食奶**丁香散方**

丁香(二十個) 母丁香(一個) 藿香(一錢) 半夏(五個, 湯泡七次)

上件末, 都以薑汁浸三宿, 焙乾再為末。每服一字, 藿香湯下。

長沙醫者鄭愈傳治霍亂候, 嘔逆不止, 心胃虛熱。**人參散方**

人參 陳皮 桔梗 甘草(炙) 白芷(各二錢)

上件為末。每服一錢, 水五分, 入淡竹葉煎二分, 入蘆荻根煎亦得。

吐利第六

(但吐利而不霍亂)

《巢氏病源》小兒吐利候：吐利者, 由腸虛而胃氣逆故也。小兒有解脫, 而風冷入腸胃, 腸胃虛則泄利, 胃氣逆則嘔吐。此大體與霍亂相似而小輕不劇, 悶頓, 故直雲吐利, 亦不呼為霍亂也。

錢乙論小兒初生三日內吐瀉壯熱, 不思乳食, 大便乳食不消, 或白色, 是傷食, 當下之, 後和胃。下用白餅子, (方見本門。)和胃用益黃散主之。(方見胃氣不和門中。)

錢乙論小兒初生三日以上至十日, 吐瀉, 身溫涼, 不思乳食, 大便青白色, 乳食不消, 此上實下虛也。更有兼見証：肺主睡露睛、喘氣, 心主驚悸、飲水, 脾主困倦饒睡, 肝主呵欠頓悶, 腎主不語畏明, 當瀉。見兒兼臟, 補脾益黃散主之。此二証多病秋夏也。(益黃散方見胃氣不和門中。)

錢乙論夏秋吐瀉, 五月二十五以後吐瀉身壯熱, 此熱也, 小兒臟腑十分中九分熱也。或因傷熱, 乳食吐乳不消, 瀉深黃色, 玉露散主之。六月十五日以後吐瀉身溫, 似熱, 臟腑六分熱四分冷也。吐嘔乳食不消, 瀉黃白色, 似渴, 或食乳, 或不食乳, 食前必服益黃散, 食後多服玉露散。七月七日以後吐瀉身溫涼, 三分熱七分冷也。不能食乳, 多似睡, 悶亂, 哽氣、長出氣, 睡露睛, 唇白、多噦, 欲大便, 不

渴，食前多服益黃散，食後少服玉露散。八月十五日以後吐瀉，止冷無陽也，不能食乳，乾噦，瀉青褐水，當補脾，益黃散主之，不可下也。（玉露散方見本門，益黃散方見胃氣不和門中）。

錢乙論吐瀉，爭上去：廣親此宅，四大王宮五太尉病吐瀉不止，米谷不化，眾醫用補藥，言用薑汁調服之。六月中服溫藥，一日益加喘吐不定。錢曰：當以涼藥治之，所以然者，謂傷熱在內也。用石膏湯三服，並服之。眾醫皆言：吐瀉多而米谷不化，當補脾，何以用涼藥？王信眾醫，又用丁香散三服。錢後至曰：不可服此，三日外必腹滿身熱，飲水吐逆。三日外一如所言。所以然者，謂六月熱甚，伏入腹中而令引飲，熱傷脾胃即大吐瀉。他醫又行溫藥，即上焦亦熱，故喘而引飲，三日當死。眾醫不能治，複召錢至宮中。見有熱証，以白虎湯三服，更以白餅子下之，一日減藥二分，二日、三日又與白虎湯各二服。四日用石膏湯一服，旋合麥門冬、黃芩、腦子、牛黃、天竺黃，茯苓、以朱砂為衣，與五丸，竹葉湯化下，熱退而安。

錢乙論虛實下藥云：馮承務子五歲，吐瀉壯熱不思食。錢氏曰：目中黑睛少而白睛多，面色白，此子必多病。面色白神怯也，黑睛少腎虛也，黑睛屬水，本怯而虛，故多病也。縱長成必肌膚不壯，不耐寒暑。易虛易實，脾胃亦怯，更不可縱酒欲，若不保養，不過壯年。面上常無精神光澤者，如婦人之失血也。今吐利不食，壯熱者，傷食也，不可下，下之虛。入肺則喘，入心則驚，入脾則瀉，入腎則益虛，此但以消積丸磨之，為微有食也。如傷食甚則可下，不下則成癖也。實食在內，乃可下之，下畢，補脾必愈。隨其虛實無不效者。

錢乙有吐瀉問難云：廣親宮七太尉，七歲，病吐瀉。是時七月，其証全不食而昏睡，睡覺而悶亂、哽氣、乾嘔、大便或有或無、不渴。眾醫作驚治之，疑睡故也。錢曰：先補脾後退熱，與使君子丸補脾，退熱石膏湯。

次日又以水銀、硫黃二物下之，生薑水調下一字。錢曰：凡吐瀉五月內，九分下而一分補。八月內，十分補而無一分下。此者是脾虛瀉，醫妄治之，至於虛損，下之即死。當只補脾，若以使君子丸即緩。錢又留溫胃益脾藥止之。醫者李生曰：何食而？錢曰：脾虛而不能食，津少即逆。曰何瀉青褐水？曰：腸胃至虛，冷極故也。錢治而愈。

錢乙附方，凡小兒吐瀉當溫補之。余每用理中丸以溫其中，以五苓散導其逆，五苓最治小兒吐。連與數服，兼用異功散等溫藥調理之，往往便愈。若已虛損，當速生其胃氣，宜與附子理中丸，並研金液丹末，煎生薑、米飲調灌之，唯多服乃效。（服至二、三兩無害）。候胃氣已生，手足漸暖，陰退陽回。然猶蠲，即減金液丹一、二分，增青州白丸子一、二分，同研如上服。以意詳之，漸減金液丹，加白丸子，兼用異功散、羌活膏、溫白丸、鉤藤飲子之類調理至安。依此治之，仍頻與粥，雖至危者，往往死中得生，十救八、九。

《嬰童寶鑒》：小兒為乳母飲酒，淫情亂，乳子為疾；其候吐瀉青黃水，身熱、啼叫如驚，不治。

《嬰童寶鑒》小兒吐利歌：

小兒吐利早須醫，只為腸虛逆氣為，更有中它湯藥毒，必加煩躁在心脾。

《千金》治少小吐利方。

亂髮(半兩, 燒) 鹿角(六銖)

上二味末之, 米汁服一刀圭, 日三服。

《千金》又方

上用熱牛屎合之。一作牛膝。

《千金》又方

上用熱特豬屎, 水解取汁少少服之。

《外台》: 劉氏療百日以下羸內兒吐利方。

面(一錢, 炒) 乳汁(二兩) 龍骨(六分)

上三味煎龍骨, 和炒面服之即瘥。

《聖惠》治小兒吐利, 發熱不欲乳食。人參散方

人參(半兩, 《嬰孺》用四兩) 乾薑(炮, 銼) 桂心(各一分, 《嬰孺》各用三分) 甘草(一分, 炙, 銼, 《嬰孺》用四分) 黃芩(二分, 《嬰孺》用六分)

上件藥搗, 粗羅為散。每服一錢, 以水一小盞, 棗一枚, 煎至五分去滓, 不計時候, 稍熱服之。隨兒大小以意增減。

《聖惠》治小兒吐利, 腹脅虛悶。訶梨勒散方

桂心(一分) 訶梨勒皮 人參 白朮 甘草(炙) 濃朴(去粗皮, 塗生薑汁炙令香熟) 陳皮(各半兩)

上件藥搗, 粗羅為散。每服一錢, 以水一小盞, 煎至五分去滓, 不計時候, 稍熱服之。量兒大小以意加減。

《聖惠》治小兒冷熱不和, 吐利不止。白朮散方

白朮 木香 丁香 陳皮(焙, 各一分) 麥門冬(三分, 去心, 焙)

上件藥搗, 粗羅為散。每服一錢, 以水一中盞, 煎至五分去滓, 不計時候, 稍熱服。量兒大小以意加減。

《聖惠》治小兒吐利兼胸脅脹滿草豆蔻散方

草豆蔻(去皮) 木香 五味子 人參 白茯苓 陳皮(湯浸去白, 各一分) 訶梨勒皮 甘草(炙, 銼, 各半兩)

上件藥搗, 粗羅為散。每服一錢, 以水一小盞, 煎至五分去滓, 不計時候, 稍熱服。隨兒大小以意加減。

《博濟方》治小兒未及周, 吐瀉不止, 因乳母氣血勞神, 或熱奶傷胃, 致有痰涎。中和散方

雄黃(好者少許) 大黃 五靈脂(各等分)

上件三味同研為細末。每服一字, 磨刀水調下。

《譚氏殊聖》治小兒吐瀉方。

白滑石 硫黃(各等分)

上細研，淘糯米泔調下一字。新生小兒未盈月及百日舌上生瘡，口中白膏濃如池紙，用坯子燕脂少許，兒病用女乳汁，女病用兒乳汁同調，塗舌上一宿，立效。

《譚氏殊聖》治小兒吐瀉不止乳香丸方

乳香 朱砂(各一錢) 半夏(半兩，湯浸七遍，切破，用生薑汁炒令黃色)

上為末，麵糊為丸如綠豆大。每服三、二丸，如五歲以上五、六丸，米飲下。

茅先生：小兒吐瀉丁香散方

丁香(二七粒) 肉豆蔻(一個) 木香(一錢)

以上三味研損，用醋面裹，熱灰煨，令面赤色取出，不用面，入後藥：

藿香 桂心(各半錢)

上此二味和前三味拌合為末。每服一字半錢，用陳米飯煮飲調下。

《嬰孺》皇子湯 治少小痢下、吐逆，壯熱數日不止，不得乳哺，或但羸困欲死方。

甘草(炙) 牡蠣(末) 芍藥 桂心(各三兩)

上為粗末。一歲兒水一升，內四方寸匕，煮三合頓服，日再。小兒以意加減。此能除熱止痢，上下神驗。

《嬰孺》治少小驚，兼少小下痢，及吐十日以上。以意量之與服，二十日以上依此方合服。苦七、八日以上倍加藥，過此以意消息增減。神妙方。

大黃(三錢) 鉤藤(六合) 黃耆(二分) 細辛(半分) 蛇蛻皮(三寸，炙) 蚱蟬(二個，炙) 甘草(一分，炙)

上切，以水一升半煮五合，絞去滓，研牛黃五大豆許，入湯中。一服一棗許，日三夜一，亦同。灸兩耳前三炷，必瘥。無牛黃，以真麝香代之。

《嬰孺》治少小寒中吐利及客忤。溫白丸方

附子(炮) 桔梗(各二兩) 人參(一兩) 乾薑(二分)

上為末，煉蜜丸。二十日兒麻子大一丸，五十日兒胡豆大一丸，百日兒小豆大一丸，不知加之。

《嬰孺》醋酒白丸子 治吐利寒中並客忤方。

半夏(洗) 人參(各三分) 桔梗 附子(炮去皮臍) 乾薑(各四分)

上為末，以苦酒和丸小豆大。一服一丸，日三服。此是一歲服法。

錢乙異功散 溫中和氣，治吐瀉，思食。凡小兒虛冷病，先與數服，以正其氣方。

人參(切去頂) 茯苓(去皮) 白朮 甘草(炒) 陳橘皮(各等分)
上為細末。每服二錢，水一盞，生薑五片，棗二個，同煎至七分，食煎溫熱服。量多少與之。

錢乙玉露散 一名甘露散方

甘草(生，一分) 寒水石(嫩而微青黑，中有細紋者是) 石膏(堅白而手不可折者，有牆壁堅白石膏是，如無，以方解石代之，敲段，段皆方是也。各半兩)
上同為細末。每服一字或半錢，一錢食後溫湯調下。

錢乙治壯熱白餅子方 又名玉餅子

滑石 輕粉 半夏 天南星(二錢，湯浸七次，為末。同上各一錢) 巴豆(二十四個，去皮膜，水一升，煮水盡為度)
上研勻，巴豆後入。眾藥以糯米飯為丸，小綠豆大，捏作餅子。三歲以上三、五餅子，以下三餅子，煎蔥白湯臨臥服。

錢乙附方金液丹 治小兒吐瀉，虛實極最妙。沈存中《良方》論金液丹云：親見小兒吐利劇，氣已絕，服之複活者數人。真不妄也，須多服多驗。

錢乙附方 治小兒脾胃虛寒，吐瀉等病及治冷痰。

齊州半夏(一兩，湯泡七次，切，焙) 陳粟米(三分，陳粳米亦得)
上 咀，每服三錢，水一大盞半，生薑十片同煎至八分，食前溫熱服。

張渙治小兒三焦不調，停寒膈上，乳哺不消，胸膈痞滿，甚則喘逆，吐利，肌體痿黃。勻胃散方

甘草(一分，炙) 藿香葉 白豆蔻 人參(去蘆頭。各一兩) 木香 乾薑(炮) 濃朴(去粗皮，塗生薑汁炙令香熟) 丁香(各半兩)
上件搗，羅為細末。每服一錢，水一小盞，入生薑二片，煎至六分，去滓溫服。

張渙 益中湯方 治嘔吐兼瀉利。

人參(去蘆頭) 青橘皮 丁香(各半兩) 桂心 訶梨勒皮(各一分) 草豆蔻(三枚，去皮炒)
上件搗，羅細末，每服半錢至一錢，米飲調下。量兒大小加減。

《嬰童寶鑒》治小兒吐利不止不二丸方

巴豆(三十個，去心膜細研，別用好黃連半兩水浸，染紙兩張裹豆，令出油) 朱砂(末，一錢重) 寒食面(一錢九)
上件研勻，滴水為丸如綠豆大。以新汲水磨下一丸。

《萬全方》治脾胃氣虛，止吐瀉。人參散

人參 白茯苓 白朮 乾葛 陳橘皮(去瓢) 濃朴(薑汁塗，炙。以上各等分)
上件為末，每服半錢，用沸湯點。量大小服之。

《惠眼觀証》**沉香飲子** 大治吐瀉方。

沉香 丁香 藿香(各半錢。劉氏各用一錢) 肉豆蔻(二個) 檳榔(二個。劉氏用一個) 甘草(炙, 一錢。劉氏各一分)

上為末。每服一大錢, 水一小盞, 入老薑一小指大, 捶碎同煎三兩沸, 去滓, 溫服。

《惠眼觀証》**醒脾散** 治吐瀉, 脾困多睡, 不思飲食方。

人參 木香 茯苓 陳皮(去白) 甘草 草豆蔻(去皮) 濃朴(同 砂一錢, 膽水一碗, 入此二味煮, 令乾, 都細切, 焙。以上各一分) 白朮(半兩)

上為細末。每服一錢, 以冬瓜子煎湯下。

《劉氏家傳》**人參異功散** 治小兒瀉利, 止嘔逆, 順氣補虛方。

人參(一錢半) 白朮(半兩) 青皮 陳皮 茯苓 甘草(各一分) 豆蔻(三個, 入訶子)

上末之。每服一錢, 陳米飲調下。如秋間合則入訶子, 春夏不用。或用紫蘇、木瓜煎五、七沸, 半盞, 末半錢, 或加至一錢, 逐日早服。如是小兒傷風, 應諸般傷寒, 但以此藥正卻, 氣候和然後以紅棉散(方見挾驚傷寒門中)治之, 無有不效。

《劉氏家傳》**醒脾散** 治小兒吐瀉脾困方。

人參(二分) 丁香(二十粒) 白茯苓 白朮(各一分) 藿香 甘草(炙。各一錢) 天南星(一個, 七、八錢重, 去心, 用縮砂仁十個入在天南星內, 面裹煨熟, 面焦黃為度, 去面不用)

上件同為細末。每服一錢, 水六分, 生薑三片, 冬瓜子十四粒同煎, 三分溫吃。不拘時候服。

《張氏家傳》**降靈丹** 一名**來複丹**, 治小兒非時吐瀉(古方)。

舶上硫黃 雪白硝石(二味各一兩, 並於沙石銚或銀器內用文武火慢炒, 溶令作珠子, 無令火緊, 太過即不中, 須傾在紙上於冷收之, 研細末, 二味先成末乃妙) 蓮花青皮 年久陳皮(炒乾) 上等無石五靈脂(以上各一兩)

上為細末, 白麵糊為丸豌豆大。每服十五丸, 空心, 食前溫米飲下。備小兒服食者, 丸作麻子大, 看大小加減之。二味配類, 陰陽均平, 有天地中和之氣。可冷可熱, 可緩可急, 治陰陽不調, 冷熱相製, 榮衛差錯, 上下隔塞, 心腎不升降, 水火不交養; 丈夫、女人、老幼、嬰兒危証候, 並可救治。但一點胃氣在, 服者無不獲安。邪熱炎上煩躁者, 一服定; 冷熱攻注急痛者, 並一服定。諸霍亂, 吐瀉水穀, 湯藥不住, 一服定。大般吐逆, 唇口青色, 手足厥冷, 腳轉筋者, 兩服定。著熱煩躁, 昏塞倒地, 不省人事者, 兩服省。只時下不得吃水。若瀉利, 不問赤白、冷熱, 量深淺與服; 或非時吐瀉, 氣痞, 食不下者, 每服三十丸, 甚者五十丸, 輕者二十丸。小兒十丸、十五丸; 嬰兒三丸、五丸; 新生牙兒一丸、兩丸, 化破令服。小兒因驚成癇, 發歇多日, 變成虛風, 或作慢驚者, 五、七丸並服, 兩服定。慢驚本非風, 胃氣欲絕故也。若已絕即難救, 亦得時暫生爾。若胃氣稍在, 雖困死亦可救也。大人亦然, 但一切危急, 不識証候並治之。此藥不問神聖通靈, 救人之寶, 其色不定, 隨時變動, 慎勿輕傳。

《張氏家傳》**六神丹** 定吐瀉方。

丁香 木香 肉豆蔻(面裹炮熟) 訶子肉 使君子仁(各一分) 蘆薈(二分)

上件為細末。薄麵糊為丸如綠豆大，粥飲吞下。

《張氏家傳》小兒驚風或吐或瀉，脾困不進飲食或傷風，潮熱或喘後出汗，宜服此調中**六神散**方

白朮 茯苓 甘草 藿香葉 草果子(各一分) 丁香(二錢)

上為細末。每服一錢，紫蘇、米湯煎下。應氣不勻，疳瀉痢，神妙。

《張氏家傳》治小兒吐瀉**紫霜丸**方

代赭石 陳皮(去白，巴豆肉半錢同炒乾，巴豆不用)。木香 杏仁(去皮尖研。各一分) 肉桂(去皮不見火) 丁香(各半錢) 藿香葉(二錢)

上為細末，粟米飯為丸小綠豆大。每服七粒，藿香湯吞下。吐瀉，炙藿香、橘皮湯吞下。吐，煎棗子湯吞下。

《張氏家傳》治嬰孩榮衛虛，脾胃弱吐瀉，**異功散**方

人參 白朮 甘草(炙) 白茯苓 白扁豆 陳皮(去白。各等分)

上件為細末。每服半錢，陳米飲調下。

《莊氏家傳》**木香丸** 治大人小兒吐利方。

木香 白茯苓(各等分)

上為末，煉蜜和丸梧子大。每服二十丸，生薑米飲下。小兒量大小化服三、五丸。

《莊氏家傳》：小兒吐瀉方。

舶上硫黃 藿香

上二味等分為末。每服半錢，生糯米泔水調下。

《莊氏家傳》**羌活膏** 治小兒吐瀉不止，煩渴悶亂，欲成脾風，手足微搐。但非次發熱不能辨認証候，請於一時中並服，隨手有應。冬末春初最宜頻服。(一方治小兒困驚，發熱涎漱，累徑痢病，因傷乳食吐瀉後，氣虛弱，精神昏倦，減乳食，手足厥冷，脈息微細，漸成慢驚，用藥亦同。

羌活 獨活(各去蘆頭) 人參(切) 白茯苓(去皮切) 天麻(微炙) 乾蠍 青黛(研。各一分) 腦麝(各半分。研) 水銀 硫黃(各一錢。結砂子)

上為末研勻，煉蜜丸皂子大，捏作餅子。五、七歲每服三餅，三、二歲二餅，一歲半餅、一餅。如身發熱，煎荊芥乳香湯下。手足厥冷，人參生薑湯化下。家中舊傳方有丁香，而無龍、麝、青黛。今所合去三物，亦不曾入丁香。三、二歲小兒每服止一餅，不敢多與，恐大寒也。若吐甚，煎丁香湯化下亦佳(歐陽行之所傳方在前，少異)。

《莊氏家傳》秋深腹虛，吐瀉無時，吃食微細，面目黃腫方。

胡黃連 丁香 馬牙硝 密陀僧 訶子(五分) 豆蔻(二個) 檳榔(一個) 麝香(少許)

上為末，用蒸餅酒浸為丸如綠豆大。每服三丸，陳米飲下，日三服。五歲五丸，止吐用楠木湯下，止瀉用綠豆湯下。

《莊氏家傳》治吐瀉方。

丁香 白朮(等分)

上末，糊為丸粟大，米飲下十丸至十五丸，臨時增減。

《王氏手集》**大白朮散** 治脾胃氣虛，嘔吐、泄瀉；外熱裡寒，手足厥逆，昏困嗜臥，面色青白，下利清穀，不思乳食方。

甘草(炙) 乾薑(一兩半) 附子(一個，生用去皮，破作八片)

上為細末。每服一錢，水六分盞，生薑二片，同煎至四分去滓，溫服。量兒大小加減服。

《王氏手集》治小兒吐逆，兼吐利不止方。

丁香 藿香(各一分) 木香(一錢) 硫黃(半兩，別研極細滑) 滑石(二錢，研如粉)

上為末。每服一錢或半錢，米飲調下，量大小與之。如瀉，即用附子一枚重半兩者，炮去皮臍為末；再用生薑汁搗成餅子，用白面裹之，慢火煨，面熟去面不用；只將附子切焙，再搗羅為末。每吐兼瀉，即入附子末少許，如藥三之一。更量虛實，以米飲調下神驗。吐如激水者亦定。吐利不止，多成慢驚，宜速療之。如已成慢驚，兼金液丹與之。

《趙氏家傳》治小兒吐瀉不止，溫胃消食。**白朮丸方**

白朮 木香 丁香 肉豆蔻 黃連(各等分)

上為末，麵糊為丸，如黃米大。每服十丸，米飲下。

《吉氏家傳》治吐瀉**藿香散方**

藿香(一兩) 丁香(一錢) 木香 縮砂(各半兩)

上末。每服半錢，水五分，煎三分，通口服或續加陳皮、草果、甘草、人參，尤妙。

《吉氏家傳》治吐瀉方。

草果子 甘草(各一兩。炮)

上等分為末。每服半錢，米飲調下。

《吉氏家傳》治吐瀉，不進飲食。**溫脾散方**

蒼朮(二錢，細銼，先以油蔥炒赤色) 陳皮(去白) 草果子(不炮，去皮用) 肉桂(不見火，各半錢) 桔梗甘草(各一錢) 僵蠶(少許)

上末。每服半錢，棗湯調下。

《吉氏家傳》治吐瀉**參苓散方**

人參 白茯苓 山藥 乾葛 麥門冬(去心) 黑附子(炮去皮臍) 桔梗 甘草(炙。各半兩) 蓮子心 木香
(不見火。各一錢) 藿香葉(一分)
上為末。每服一錢，紫蘇米飲調下。

《朱氏家傳》：大止小兒吐瀉方。

鬱金(一個，刮開心，入去殼巴豆一個在內，用面裹煨熟取出，候令去面與巴豆，只用鬱金一味為末)。
上以米泔汁調下一字大，止小兒吐瀉。

《朱氏家傳》又方

龍骨(一分) 赤石脂 縮砂(去皮。各一兩)
上件為末。面湯下一字或半錢，大人一錢，若止吐即入丁香一分代縮砂。

長沙醫者李剛中傳小兒夏秋吐瀉藥方。

黃連(大者一兩，銼碎，去鬚、土砂，令深色冷，使入號丹一兩，同黃連一處炒令號丹焦赤色為度，傾出在紙上於地冷)
上二味共為細末，薄煮麵糊為丸如芥籽大。每服二十粒，加至二十粒。用壁土生薑煎湯吞下，更量大小加以丸數服。亦不妨須連並二服，立效。

長沙醫者丁時發傳一揀散 治小兒滑泄，腹脹作瀉、吐逆，可思食方

陳皮 青皮 丁香(各一錢) 訶子肉 甘草(炙。各一分)
上為細末，米飲調下。

長沙醫者毛彬傳銀白散 治小兒胃氣不和、吐瀉不止；痰逆，不進奶食，平胃引行諸藥方。

半夏(一兩，湯洗七次，焙乾為末，薑汁製為餅子) 白扁豆(微炒) 罌粟子 人參(洗，去蘆，銼) 白朮
(洗，銼焙) 山藥 白茯苓(以上各四錢)
上七味同為細末，每服二錢，水八分，生薑二片，棗子一顆，煎六分，溫服。

長沙醫者毛彬傳桃紅散 治小兒脾胃虛弱，乘冷吐瀉不定，不問冷熱可服方。

人參(去蘆，洗銼) 藿香(去梗用葉) 曲紅色(各二錢半)
上件同為細末。每服半錢，米飲調下，無時。量兒大小加減。

吐利津液少第七

《聖惠》治小兒渴不止方。

蘆籜 扁豆藤(各半兩) 人參(一兩，去蘆頭)
上件藥細銼，分為六服。每服以水一小盞，煎至五分去滓，不計時候，量兒大小分減，稍熱服。

錢乙豆蔻散 治吐瀉、煩渴、腹脹、小便少方。

豆蔻 丁香(各半分) 舶上硫黃(一分) 桂府白滑石(三分)
上為細末。每服一字至半錢，米飲調下，無時。

張渙 調胃膏方 治吐利服藥不下，煩渴者即先服。

人參(去蘆頭) 白朮(炮) 丁香(各二錢) 乾薑 甘草(炙) 赤茯苓(各半兩)
上件搗，羅為細末，煉蜜和丸皂皂大。每服一粒，用熱湯化下，用新水或冷水沉之極冷即服。

張渙 三和散方 治吐利、津液燥少。

白茯苓(一兩) 烏梅肉(炒乾) 乾木瓜(各半兩)
上件搗，羅為細末。每服一錢，水一小盞，煎至五分去滓，放溫，時時服之。

張渙 香豆散方 霍亂煩渴最宜服之。

藿香葉 肉豆蔻(各一兩) 白扁豆 人參(各半兩) 甘草(一分，炙)
上件搗，羅為細末。每服一錢，水八分一盞，入生薑二片，煎至四分，去滓溫服。

《王氏手集》和中散 治陰陽不和，清濁相乾，霍亂吐利，壯熱煩渴，胸膈痞悶，腹脅脹滿，面色青白，手足厥寒，困頓多睡，全不思食方。

乾薑 濃朴 甘草(炙。各一兩)
上同為細末。每服一大錢，水八分盞，生薑三片，同煎至三分去滓，溫服。

長沙醫者丁時發傳人參散 治小兒虛熱及吐瀉，煩渴不止及疏轉後可服方。

人參 茯苓 桔梗 乾葛(各半兩) 生犀角(屑) 甘草(炙。各一分)
上為末。每服一錢，水一中盞，入燈芯煎五分。煩渴入新竹葉煎服。大小加減與服。

吐利心腹痛第八

《聖惠》：夫小兒冷熱不調，乳哺不節，使陰陽清濁之氣相乾而變亂於腸胃之間，則成霍亂也。而心腹痛者是冷氣與真氣相擊，或上攻心，或下攻腹，故冷痛也。

《外台》：《廣濟》療小兒霍亂，心腹刺痛吐利方。

茯苓 桔梗 人參(各六分) 白朮(五分) 甘草(炙) 濃朴(煮。各四分)
上六味切，以水二升，煮取六合去滓，溫服之。

《聖惠》治小兒霍亂，心腹刺痛，嘔吐。丁香散方

丁香 桔梗 人參 白朮 濃朴(去皮銼，薑汁炒。各半兩) 甘草(炙，銼，一分)
上件藥搗，粗羅為散。每服一錢，以水一小盞，煎至五分去滓，不計時候。量兒大小分減與溫服。

《聖惠》治小兒霍亂，心腹痛，不欲飲食。人參散方

人參 白朮 芎 草豆蔻 濃朴(薑汁炒用) 當歸(銼炒) 陳皮(去白, 焙) 丁香 桂心(各一分)
上件藥搗, 細羅為散, 不計時候, 煮薑棗, 米飲調下半錢。量兒大小以意加減。

《聖惠》治小兒霍亂心腹痛不止**高良薑散方**

高良薑(銼) 人參(去蘆頭) 赤芍藥 甘草(炙微赤, 銼) 陳橘皮(湯浸去白瓢, 焙乾, 半兩)
上件藥搗, 羅為散。每服一錢, 以水一小盞, 煎至五分去滓, 不計時候。量兒大小分減服之。

《聖惠》治小兒霍亂吐瀉不止, 心腹痛, 面色青黃, 四肢冷。**溫中散方**

白朮(三分) 人參(一兩, 去蘆頭) 乾薑(一錢, 炮製, 切炒, 銼) 濃朴(去皮, 塗生薑汁炙令香熟) 甘草(炙微赤, 銼) 桂心(各半兩)
上件藥搗, 粗羅為散。每服一錢, 以水一小盞, 煎至五分去滓, 不計時候。量兒大小加減溫服。

《聖惠》治小兒霍亂, 乳食不消, 心腹滿痛宜服此方。

訶梨勒皮(半兩) 木香 當歸(銼, 炒) 白朮 藿香 陳皮(去白, 焙。各一分)
上件藥搗, 細羅為散, 不計時候, 以生薑湯調下半錢。看兒大小以意加減。

《聖惠》治小兒霍亂, 吐瀉不止, 心腹痛, 面無顏色, 漸至困乏。**白朮散方**

白朮 丁香 陳皮(去白, 焙。各半兩) 草豆蔻(去皮) 當歸(銼炒。各一分) 甘草(半分)
上件搗, 細羅為散, 不計時候, 以粥飲調下半錢。量兒大小加減, 溫服。

《聖惠》治小兒霍亂吐瀉, 心腹痛不定。**丁香散方**

丁香 乾薑(炮) 甘草(炙, 銼) 桂心(各半分) 訶梨勒皮 人參(各一分)
上件藥搗, 細羅為散, 不計時候, 煎薑棗湯調下半錢。量兒大小以意加減。

《聖惠》治小兒霍亂, 吐瀉不止, 腹痛。**肉豆蔻散方**

肉豆蔻(去殼) 桂心(各一分) 人參(去蘆頭) 甘草(炙微赤, 銼。各半錢)
上件藥搗, 粗羅為散。每服一錢, 以水一小盞, 入生薑少許, 煎至五分, 去滓, 不計時候。量兒大小分減, 溫服。

《嬰孺》治小兒卒吐利, 腹痛及久下。**當歸湯方**

當歸 人參 甘草(炙) 乾薑 黃 (各四分) 細辛(三分)
上以水四升, 煮取一升半, 三、四歲兒為三服, 小兒以意增減水藥。

《嬰童寶鑒》治小兒霍亂吐利, 腹中疼痛。**針頭丸方**

巴豆肉(二個, 水半盞煮乾) 阿魏(雞頭大一塊) 舶上硫黃(一塊, 同阿魏大)
上件研勻, 以薄糊搜作餅子如錢眼大。每服一餅子, 針頭穿定, 燈上燒, 留三分性, 淡薑湯化開服。

《莊氏家傳》**大人參丸** 和脾胃止嘔吐，治泄瀉青黃，止腹痛多啼，進乳食方。

丁香 木香 白朮(各半兩) 藿香葉(一兩半) 人參(二兩)
上為細末，煉蜜丸雞頭大。每服一丸，粟米飲化下。

《趙氏家傳》**正氣人參膏** 治小兒脾胃氣虛，中寒腹痛，泄利嘔逆，不入乳食，夜啼多哭，睡中驚，吐利蛔蟲，虛煩悶亂，常服止煩渴，調脾胃進飲食方。

人參 乾木瓜 甘草(細銼，炒。各半兩) 陳橘紅 罌粟米(炒) 乾薑(炮) 茯苓(各一分)
上為末，煉蜜和為膏。每服一皂皂大，米飲湯化下。

冷吐第九

張渙 **溫脾散方** 散寒濕，治嘔吐。

濃朴(去皮，薑汁拌炒，用一兩) 丁香 白朮 乾薑(各半兩) 肉桂(一分)
上件搗，羅為細末，每服一錢，煎人參湯調下。

張渙治小兒胃氣不和，乳哺重沓及食入不消或吸風冷即令嘔吐，若不止最為大病。**聖石丹方**

真陽起石 半夏(洗七遍，焙乾。各半兩) 人參(去蘆頭) 木香 白茯苓 丁香(各一兩) 礞石(木炭火燒一伏時，四兩) 不灰木(木炭火燒一伏時，四兩)
以上搗，羅為細末，次用：杏仁 巴豆(二件連皮於燈上燒為度。各二七個) 阿魏(各一兩)
上件同為細末，用湯泡炊餅和丸如龍眼大。每服一粒，水一盞，入生薑一皂子大，同拍碎，煎五分放溫，時時服之。煎藥時於銀器中煎，石器亦可。

《九 衛生》**流星散**療小兒胃氣虛冷，痰吐嘔逆方。

半夏(十四個，大者生用) 胡椒(四十九粒)
上同為粗末。每服半錢，水一盞入生油七滴，煎至四分，去滓溫服。

《莊氏家傳》治小兒胃虛寒，腹脹，吐逆。**丁香丸方**

丁香 木香 藿香 牛黃(以上各半兩) 腦麝(各一錢) 膩粉(少許)
上一處為末，麵糊為丸小豆大。熱湯化一丸服之。

《吉氏家傳》治脾胃冷吐逆，水食不下，噎奶，胃冷吐食，因乳母多食酒、肉、淹藏毒物得之。噎奶宜與驚藥微疏。下中結丸方

禹余糧(火 赤，米醋碎半兩) 巴豆(面裹煨，七粒) 朱砂(皂子大) 澱粉(炒，三分) 麝香(少許)
上件為末，蒸餅為丸綠豆大。每服三、五丸，遠志湯下。

長沙醫者相 傳**肉豆蔻丸** 治小兒胃冷嘔吐不止，諸藥不效者方。

肉豆蔻(面裹煨令香熟為度，去面不用，半兩) 丁香(一錢)

上同為末，水煮白麵糊為丸如芥子大。量兒大小加減，每服三、五丸，濃煎藿香柿蒂湯下便止。如大人患吐，加丸數，亦如此湯使服之。如渴，以所煎湯作熟水飲之。

長沙醫者丁時發傳 治小兒乳哺飲食溫冷過度，傷於脾胃，腸脅脹滿，多吐痰涎方。

人參 丁香 乾薑 半夏(洗七遍。各半兩) 白朮 陳皮(各一兩)

上為末，麵糊和丸如麻子大。每服十粒，溫湯下。

熱吐第十

《聖惠》治小兒嘔吐不止，心神煩熱。麥門冬散方

麥門冬(去心，焙) 淡竹茹(各半兩) 甘草(炙，銼) 人參 茅根 陳皮(去白，焙。各一分)

上件藥搗，粗羅為散。每服一錢，以水一小盞入生薑少許，煎至五分去滓，稍熱頻服。量兒大小以意加減。

《聖惠》治小兒嘔吐，心胸煩熱。麥門冬散方

麥門冬(去心) 濃朴(去皮，薑汁炒用) 人參(各半兩)

上件藥搗，粗羅為散。每服一錢，以水一小盞，入生薑少許，棗一枚，粟米五十粒，煎至四分去滓。放溫。量兒大小，漸漸與服。

《聖惠》治小兒嘔吐，心煩熱渴。蘆根粥方

生蘆根(銼，二兩) 粟米(一合)

上以水二大盞，煎至一盞去滓，投米作粥入生薑，蜜汁少許食之。

太醫局 定吐救生丹 治小兒伏熱，生涎，心膈煩躁，壯熱霍亂，乳食不下，嘔噦惡心，或發吐逆方。

川大戟(漿水煮，切，焙乾為末，一十五兩) 膩粉 粉霜(各研七兩半) 龍腦(研，二兩半) 乳香(八分，研) 丁香(為末。各五兩) 水銀 鉛(與水銀同結砂子) 黃蠟(各十二兩半)

上合令研勻，每溶蠟一兩，入蜜二錢半和為丸，如黃米大。每一歲兒服一丸。如煩躁研生芝麻、馬齒水下，如吐逆，煎丁香馬齒湯下。更量虛實加減，食後臨臥服之。此藥除熱化涎，下膈止吐逆。若胃虛傷冷，嘔吐不止者不可服。凡小兒吐逆，宜速療之，久不止，遂為慢驚，常宜此藥備急。

錢乙辰砂丸 治驚風，涎盛潮作及胃熱吐逆不止方。

辰砂(別研) 水銀砂子(各一分) 牛黃 腦麝(各別研半錢) 生犀(末) 天麻 白僵蠶(酒炒) 蟬殼(去土) 乾蠍(去尾炒) 麻黃(去節根) 天南星(湯浸七次，切，焙乾稗。各一分)

上同為末，再研勻，熟蜜丸綠豆大，朱砂為衣。每服一、二丸或五、七丸，食後服之。煎薄荷湯送下。

張渙 丁香益胃湯方 治胃虛挾熱，嘔吐不止。

丁香 人參(去蘆頭。香一兩) 訶梨勒皮(一分) 官桂 大黃(炮黑黃。各半兩)
上件搗，羅為細末。每服一錢，水一小盞，入生薑二片，煎至五分，去滓溫服。

張渙 保命膏方 治吐逆不定，服熱藥過多不能瘥者。

山大戟 丁香 大黃(炮) 不灰木(燒紅放冷) 甘遂(各一分)
以上先為細末，次入：

朱砂 水磨雄黃(並研細，水飛。各半兩) 粉霜 水銀(用錢結砂子。各一錢) 巴豆(去皮心膜，不出油，細研十個)

上件都研勻，用黃蠟四兩，銀石器中溶掩成膏，旋旋取和丸如黍米大。每服末周一粒，二、三歲兩粒，四、五歲三粒，六、七歲五粒，十歲以上七粒，新汲水下。

《孔氏家傳》凡小兒胃熱吐清胃散方

上用生薑薄切，以生面拌，晒極乾略焙為末，用紫蘇湯調下。

挾驚吐第十一

張渙 三香丹方 治挾驚嘔吐不止。

藿香葉 丁香(各一兩) 半夏(湯洗七遍，焙乾，半兩)

以上搗，羅為末，次入：膩粉 龍腦 麝香(當門子。各一錢)

上件同拌勻，生薑取汁，打白面為糊和丸黍米大。每服十粒，人參薄荷湯下。量兒大小加減。

《譚氏殊聖》方：小兒驚膈吐還頻，晝夜連連不暫停，綠水槐黃泔澱汁，和蟲乳食一時噴，丁香研共生犀服，五膽牛黃立有勛，若有得逢如此藥，直饒命困卻還魂。

歸命丹

丁香 藿香(各一分) 生犀(末) 牛黃(各半分) 豬 鯽 狗 熊膽 魚膽(等分，或多些無妨，共研半兩)
上為末，丸如綠豆大。量兒大小，一歲以下煎苦楝湯，研下二丸。

《譚氏殊聖》治小兒驚食，胃管不快，吐逆乳食或心胸發熱。定吐丸方

丁香(二十一枚，為末) 蠍梢(四十九條) 半夏(三個，洗，焙乾為末)

上件研勻，煮棗肉如小黍米大。每服七丸至十丸，金銀煎湯吞下。如傷暑，霍亂吐瀉，煎香茸散送下，神效。

《良方》治久患翻胃及小兒驚吐，諸吐並醫。田季散

上好硫黃(細研半兩) 水銀(與硫黃再研無星，一分)

上同研如黑煤色。每服三錢，生薑四兩取汁，酒一盞同薑汁煎，熟調藥，空心服。衣被蓋覆，當自足指間汗出，迤邐遍身，汗徹即瘥。常有人患反胃，食輒吐出，午後即發，經三年不瘥，國醫如孫兆輩，皆治療百端無驗，消羸殆盡，枯黑骨立，有守藏卒季吉見之，曰此易治也，一服可瘥。始都不信之，一日試令合藥，與少錢市藥，次日持藥至，止一服，如法服之。污出皆如膠，腥穢不可近，當日更不復吐，

遂又楚人田醫，善治小兒諸吐，亦用此藥，量兒長少服一錢至一字，冷水調下，吐立定。此散極浮，難調，須先滴少水，以指緩緩研殺。稍稍增湯，使令調和。若添入湯酒，即藥浮泛，不可服。

《王氏手集》睡驚丸 治熱化涎，鎮心神，治驚悸吐逆方。

半夏(末，製者) 乳香 犀角(末。各一錢)

上件同為末，用生薑自然汁煮麵糊為丸如綠豆大。每服七粒至十粒，薄荷水夜臥服。

毒瓦斯吐第十二

《巢氏病源》小兒服湯中毒，毒瓦斯吐下候：春夏以湯下，小兒其腸胃脆嫩，不勝藥勢，遂吐下不止。藥氣熏藏腑乃煩懊頓乏者，謂此為中毒，毒瓦斯吐下也。

《千金》治毒瓦斯吐，不腹脹，逆害乳哺。藿香湯方

藿香(一兩) 生薑(三兩) 青竹茹 甘草(炙。各半兩)

上四味 咀，以水二升煮取八合，每服一合，日三。有熱加升麻半兩。

《王氏手集》：消奶毒，令兒吃奶無毒方。

升麻(銼，半兩) 大麻子(搗破，一合)

上兩味酒浸，每日早晨與奶子一盞吃了，要乳時須先捏去些小，方與兒吃。並兒有奶毒亦解。